



樊榭山房集

和
356
9



樊榭山房集外詩

錢唐 厲鶚 太鴻

新錢文 有陶邦



六月一日集十研齋蔬食期天上人不至分得粉字

積雨潤方收初夏勢已蘊山僧結夏期我輩服食謹丈
人靜者流解菜鄙饒吻入市匪求益行園土膏墳瓠鴨
及楮雞羅列費拾擔相招同此味意與信民近飽餘沃
以茶意洽色無愠勝彼山中人但啜雲母粉

題范寬秋山過雨圖分得頂字

小山別大山秋聳青挺挺不知涼雨過微雲滅修頂干
年華原筆魂在誰喚醒石劒挂天紳亂響人清迴村沽

利
311
9



樹懸幟荒塗馬旋濘落日臨長川喚渡苦無艇牽前復
鞭後人馬俱沒脛踰時役爲勞卽次旅難竝回首數峰
坳朱甍遠光炯

十硯齋銷夏賦一字至七字詩分得井字

井清深甘冷梧院陰苔甃靜雪走連筒泉飛修綆曉漱
碧生華午料涼聚瘦一規漢苑秦宮千尺柳沂葛嶺只
應時有墜釵人白苧衫輕低照影

二月八日登豐光

入林寒尙在宜蹋最高層亂水灑叢竹春陰護一燈卷
留前代句塔葬舊房僧尙想連牀宿幽雲畫不能

銷暑小集分得蘿字

蒙密同烟荔如聞楚九歌垣衣牽碧障松幘挂青蘿漏
月一潭暗飛陰三徑多緇塵吹不到幽絕此山阿

讀史十首

金源一勺水時事百年過飲馬鴛鴦灤揮戈鴨子河運
移賓鐵壞國附活羅多可惜平陰路西樓計轉訛
入汴知何日青城氣寂寥怨軍降北塞子帝立南朝割
地終無補渝盟未可要茫茫天水碧歌舞一時銷
海陵南下日江介想投鞭小別諸妃位初徵新戰船筆
來庾語洩醫諫姓名傳拊髀知天命先書大定年
川擅金蓮號林居橫翠閒干旗發春水萬騎至秋山興
極籠鷹去歡呼射柳還西風故鄉曲憑仗好開顏

瓜步三軍駐符離百戰場乞和因象祖函首送師王天
意全羸趙人心守舊疆銷金鍋子好君相且奢荒

初設明金禁還為擊鞠游瑤池殿名暄景霽香閣午風柔
冶服逍遙玉伶人玳瑁頭鳳皇飛向裏巧笑發輕謳

文獻中原舊波瀾劇老成清詩元好問小篆党懷英居
得黃華勝王庭筠篇傳矮柏名李純甫諦摩龍什在諱宋見平生

異代元真子居然烈士風寸心存趙氏早歲識蘇公長
揖軍門下高眠滄海東北轅嗟已矣流涕恨塵蒙穆亮

宣宗亦南渡草草到中州嗚咽青山轉淒涼汴水流監
軍多掣肘強敵得無憂和議仍前轍應添上國羞青山轉汴水流

當時
二論

孟珙懸軍入重圍天地昏空歌江水曲不返蔡州魂虞
虢雖朝暮興亡有本根雪香亭上月終古照梁園

早起納涼

懶散腳不襪起來池上行露荷喧雨過風竹學泉鳴書
續宵燈讀茶催曉汲烹漸看新日上屋角已先明

送子珍之睦州

故人新定去別我雨冥冥湖海須強飯風塵尚轉萍秋
山臨夕渡孤棹指前汀牢落無勞歎雲林何限青

自秦亭山至法華山作

山下十八里為宋
時幸洞霄宮輦道

數里晴峰色誰知輦道荒茗花隨地白毛竹隔溪黃烟

磬連樵響風泉滿夕陽屬車思豹尾松柏久淒涼

永興寺

曉踏石頭路幽尋不礙回連峰緣徑轉香國隱花開修
竹流疎磬長廊徧古苔翔禽白如雪知是看山來

雪中答子珍睦州見寄

縈盈復紛糝新雪暖鑪前忽枉瑤華贈能令幽思傳寒
聲巖瀨水曉色定山烟何日偕桑苧來尋十九泉

元日重游南湖慧雲寺

初地春風早重過水一方祖堂連野色佛屋漾湖光松
靜蒲牢吼花寒狒狒裝向來游眺地上日倍相羊

晚步池上

蕭條吾最愛取次繞池灣水老萍千點天空月半環畏
寒魚自定識暝鳥先還漠漠生烟裏誰知此境閒

送徐紫山之廣州

非關爲別易兩地榻仍懸白髮人過嶺黃梅雨上船名
齊高士傳興在遠游篇歸踐羅浮約丹砂訣可傳

徂徠山

徂徠初在望杳靄上朝暎山雪中無路松風下有村孤
懷六逸往直節一詩存欲去屢回首遺蹤傷客魂

城東郊行

落日在城上行隨一水斜望中惟樹色意外有人家江
雨初收麥籬風小摘瓜野情非共適那得此清嘉

聖因寺大恆禪師以龍井茶易予宋詩紀事真

方外高致也作長句邀恆公及諸友繼聲焉

新書新茗兩堪耽
交易林閒雅不貪
白氈封題來竹屋
縹囊珍重往花龕
香清我亦烹時看
句活師從味外參
舌本眼根俱悟徹
鏡杯遺事底須談

白香山有
鏡換杯詩

偶見叩頭蟲戲詠

窗間壁駁響方空
躍處翻身技便窮
何物始能通叩叩
可憐應只有蟲蟲
手推一下朱門裏
心疾多生翠幌中
莫訝微形偏善媚
出來強項本難工

獨游雲居寺

病眸愁鬢怯登臨
古寺空山偶獨尋
落葉滿城迷磴道

片雲穿塔下湖陰
多花佛地何妨住
無客禪關不厭深
日晚蕭蕭天籟起
微風吹作妙聲音

同蔣靜山游報先寺

寶界人傳八百年
高低石徑到門前
離風葉莊巖樹
薄薄霜雲玳瑁天
愁豁始知禪有味
眼清更覺野無邊
偶來不為尋僧至
斜日蒼茫下亂烟

玉几惠鄂州小集率賦寄謝

薄寒淒淒欲中人
八行千里見情親
楊雲空自矜書色
最是捻來觸手新

光堯內禪萬靈趨
藝祖孫曾一綫扶
誰識書生談帝統
過于河洛會昌符

古宮詞

禁近秦淮暮靄凝昇元寺閣影層層玉梅花裏瑤光殿
 雙著袈裟拜寶燈唐南
 內苑宣華錦幄溫牡丹紅襪照金尊酒悲莫向尊前諫
 已起更衣瑞獸門蜀王
 摩訶池上暗香多水殿涼生笑語和親製填詞教侍女
 玉肌無汗冷輕羅蜀孟
 南薰殿暖書燒香蛟蝶裙拖窄地長共進樓羅新樣歷
 唱名第一得花王南漢
 月到瑤階漏點微九龍帳底夜珠輝小鬟背檻私相語
 何事歸郎不肯歸王閏

宮嬪車子趁新晴去看臨安衣錦營緩緩歸來春正好
 杭州楊柳有啼鶯吳越

楊柳枝詞

玉女窗前日未曛籠烟帶雨漸氤氳柔黃願借爲金縷
 繡出相思寄與君

六月十二日同樂城谷林集湖上

風翻十里綠雲斜隔斷孤山處士家坐愛片雲無住著
 頻移涼影過荷花右三十七首見杭郡詩輯

九月晦日柳漁招全龍泓竹田甌亭湖上看芙蓉
 蓉分韻得山字

秋花爲我破愁顏好在金沙碧水灣幾簇風亭紛掩冉

一枝烟艇與迴環狂呼太白裁宮錦嬌□文君襯遠山
只此便堪驅俗物可人雙鷺冷飛還

意林以高唱二絕送蠟梅次韻奉謝

約略明心破醜寒蜂鬚未肯點微檀想君用意冰霜裏

不別花人不與看

黃梅以磬口素心為佳

願嫁山茶正病時佛粧分映佛前枝春前一種橫陳味

鼻觀微參只自知

題秋軒先生蕉窗學易圖

秋窗疎雨漏蕉喧中有幽人味義根雨响蕉聲一時寂

始知易妙是無言

右四首見丁竹舟申所藏詩箋

秋日游城北興福寺

宋薛左丞昂捨花藥園為寺昂乃附蔡京者

亂竹疎花覆石砌虛廊自聽足音羗塵中年事堂堂過

禪外秋心嘿嘿降八丈舊游空藥圃

蔡條鐵圍山叢談稱昂為薛八丈

萬回

遺笑掩經幢

朱弁曲洧舊聞薛昂和蔡京車駕幸第詩有拜賜須臾應萬回太學生呼為薛萬回

賢愚至竟皆

陳迹付與滄洲白鳥雙

右一首見魏性之本存所藏詩箋

餘杭道中

相近餘杭道山川似永嘉樹寒鳥挾子地煖薤生花確
舍水春急溪門網晒斜他年如卜築便種故侯瓜

題楊山水閣

水檻天然好真成漫叟居芙蓉三品鳥蒲葉一雙魚隱
几時無事焚香復晏如緇帷有漁父更憶漆園書

送人歸瀟山

送人歸瀟山

二

漢帝祠南岳還封天柱山翠微終不改玉檢久應閑君
住皖公下青蒼對掩關鱸香秋盡後歸去聽潺湲

過宗陽宮是南宋德壽宮遺址三首

曉入曾城路蕭閑水木饒松涼人氣健殿迴露華銷無
復金輿駐依然絳節朝白頭逢道侶指點話光堯
瑩石通橋道當風上古臺山蟬吟不斷林翠拂還來泉
想虞琴奏蘿疑御幄開登臨思內禪浩劫使人哀
賸訝神山失蒼蒼片石存莓苔鐫古色風雨護雲根遠
貌飛來勢空歸眾妙門東京共蕭瑟莫問玉真軒

雪後寶石山二首

林坡犖确如香篆湖色沿洄似玦環瞥見郭熙小平遠

斜皴粉墨寫寒山

飢鳥接翅上觚稜一面青山塔七層塔院微鐘斷烟火
耐寒猶有赤髭僧

南湖早春

撥藍新水拍湖堤側帽年年路不迷盡日無人窺影處
蜜梅花發竊黃啼

臨平湖竹枝詞

雙鬢十五盪舟徐不見清波錦鯉書儂似湖中石鼓撓
望郎望似蜀桐魚

朱璧溪山釣雪圖

斧劈山色雪雲淡不了樹枝黃葉稀月波樓下吹笛去

絕無人影披蓑衣

坐學士港小橋望隔湖諸山

平生最愛郭熙語春山如笑心所耽秋山如妝更佳絕
境不親遇思潭潭路紆港狹暗門外兩岸樹老多楓栝
秋聲萬竅發策瑟黃葉飛墜前林龕陡出港口目盡豁
湖面百頃朝光含青山有意在隔岸狀態始得窮幽探
馮夷苦欲獻窈窕風伯爲我驅浮嵐穠花穉柳亦何有
朱粉已謝東家慚或浮亭亭遠在北或立挺挺偏依南
陰晴重掩不可數一一碧玉蓮花簪誰能水上見微步
宓妃湘女遙相參坡陀中更橫秀嶺首尾儻儻形眠蠶
歛斜斷處遠岫出眉際小缺微填藍石梁坐久劇平視

口不能語心能諳須臾殘日射滉漾金支彷彿蛟宮涵
漁舸遠列若鳧雁敗荷蕭索聲微酣似聞有語勸小住
欲築汀畔爲漁庵

右十二首見禪勺

樊榭山房集外詩

蓋聞皇娥既邈韻不唱夫璇宮穆滿云遙歌未傳于瑤
島月中桂樹羽士難逢源裏桃花漁郎安在天上乏驂
鸞之客人間無吐鳳之傳迨至庾開府仗清新之氣郭
景純用雋上之才開生面于青宮奪夜光于元圃然而
辭多感慨同坎壈之詠懷調本輕澹非列仙之本趣難
匹休乎子建終見笑于鍾嶸仙詠難工由來久已厲先
生太鴻者玉皇香吏暫謫塵寰碧落侍郎僑居瀛海朱
昇賦弓之歲便解操觚蘭成射策之年卽聞染翰琅玕
披腹門無題鳳之賓珠玉爲心座有解龜之賞一丸飛
藥逢璋瑞于西山九節菖蒲遘商邱于北海東華公子
舊是相知南嶽夫人新爲結客凝神濯魄原無俟于冰

壺洗髓伐毛亦何須于紫水乃瓊霄有路閬苑多歧既
非感遇之劉楨詎作嫉邪之趙壹聊寄懷于元遠遂託
詠于遊仙數凡三百謝家胡蝶之篇字過八千倪氏梅
花之製洞中蕊簡始足揮毫海上珊瑚差堪架筆月穿
高樹依蘿戶以敲金風度碧天傍雲窗而夏玉江花滿
篋種由瓊草之田潘錦連箱裁作流霞之帔行間冰雪
噴來卽是元霜腕底蛟螭瀉出何殊碧海笑驅素豹盤
桓墨椀之中怒逐朱龍游戲硯池之側崑崙裊裊不用
支筇煙渚茫茫何須買舶苔牋十幅俄成王屋之峯湘
帙一函都是蓬萊之島以神仙爲翰寫借文翰爲遨遊
可謂盡名士之才情極仙人之本色者矣僕與先生雲

霞意氣泉石投交架上琅函共讀通明之卷籬邊黃菊
曾傾陶令之杯風義平生兼之師友相逢今日示以瓊
瑤擊節三終何惜玉壺之缺披吟數過恍登銀闕之遙
攜來市上誰不購以千金若在牀頭人自函其一部斥
曹唐於下座誰曰不宜坐何劭于廡閒僉云允稱引尊
相對聊當醺醪之漿浣手高吟除是薔薇之露書藏二
酉何用秣稊紙貴三都甯關元宴爰等茲于弁髦敢用
是爲前驅謹序弟杭世駿拜撰

柏梁臺上曾傳五岳之圖金馬署中亦著十洲之記龍
師與魚吏俱升桂父偕茅君共舉游戲紫清之上翱翔
碧落之中桐峯梓瑟倚歌而和皇娥湘水瑤琴彈曲而
迎帝子玄雲新韻久唱璇宮黃竹舊詞猶畱瀛島樂哉
仙乎斯其至矣然而東海棗花空憶齊侯之語西池桃
核莫延漢帝之年是則塵緣未斷人間烟路遂遙天上
乃有抽思幽祕發藻鮮妍翦月爲心鏤霞作想雲君太
乙體雖誕而不刪佚女羽人意似夸而有取參軍調逸
爰咏升天之篇子建才高遂有步虛之作至於宏農之
始倡實爲屈子之餘波事雖寄于遊仙情則等於感遇
後有作者咸步趨焉此皆天情騰蹕清思雕華淹躋窮

夢樓山房集外詩序
途漂搖愁境排雲間闔思翻玉女之壺追日虞淵欲繫
羲和之轡塵迷赤縣將晞髮于滄溟唾棄齊州擬伐毛
于紫水句飛蘭露滴盡金壺紙疊桃花噴成繡字洞天
福地之勝常以神遊銀臺瓊闕之間奚勞氣馭誠可謂
揮斥八極逍遙九垓者矣僕無凌雲之才有餐霞之癖
懶如中散論或託于養生貧似稚川書未傳夫抱朴山
居長嘯偶有遐心蘿戶高吟遂多逸興身非脈望何曾
三食琅函腹愧鞠通安得一滄墨海譬彼學仙項曼詭
言渴飲流霞好道長源詐說餽來玉液但以俗緣羈縶
塵網櫻纏與其作白眼以看人何如問青天而搔首於
是效嘖郭璞學步曹唐前後所爲數凡三百瑤臺夢破

喚起飛瓊洛浦舟迴拾殘翠羽曾無當于風雅亦見擯
于莊騷持贈何堪自娛而已時當朱明屆節白日舒長
何方避暑玄冰飛雪之丸無計迎涼鵠羽龍皮之扇爨
牋雪案豈窺大酉之書滌筆冰甌聊當龜茲之枕康熙
癸巳季夏八日錢塘厲鶚題于寄圃之半舫齋

詩家游仙一體自唐人以來多爲絕句或別有寄託或近香歛豔情之作而出以迷離恂怳之辭要無無謂而作者此集爲游仙詩三百首其託意不可知而語帶煙霞有雲愁海思之遺所謂詩雜仙心者也先生編樊榭山房前後二集皆不登載聞舊有堇浦先生一序亦未之見此本乃郡人所傳鈔者亟爲梓而傳之零珠碎璧猶可寶貴况三百首之多耶同里後學陳鴻壽引

樊榭山房集外詩卷上

錢唐 厲鶚 太鴻

游仙百詠 有序

游仙詩自晉郭景純倡之逮唐曹堯賓明馬鶴松連篇累牘奇豔可誦予閒居寡歡偶爾綴韻輒成百章大要游思嚙語雜以感慨玉茗先生所謂事之所無安知非情之所有者也且靈均作騷尚託于雲中君湘夫人其亦庶幾不悖作者之意乎有好事者出而讀之詞雖不工聊當龜茲一覺云爾康熙庚寅六月樊榭山人自題

旭影瞳瞳若木枝與君雲路遠相思寄將一幅琅玕紙

要寫三山星子詞

東華南嶽笑相邀
笙鶴時聞下泐寥
月裏忽驚青鳳舞
坐中誰弄九靈簫
入水閒乘赤鯉魚
具區秋淨接空虛
橫吹煙竹包山裂
待與龍威索素書
鶴背霞光縹渺生
乘風御氣滿天行
丈人笑指前頭去
不到青城到赤城
小童汲水煮金芽
藥徑松蹊仙子家
只恐無端賺劉阮
洞門不許種桃花
石橋跨澗水粼粼
白草青芝遠世塵
林屋洞中無甲子
一朝天后不知春

瑤池仙史許飛瓊
阿母傳呼到玉京
龍月城中親采進
黃中朱李字分明
散仙自有玉樓才
點石爲金數未該
欲買鏡湖山一半
黃妃許借聘錢來
元圃年年發異葩
折來笑向媚蘭誇
金莖琪樹同千歲
不是人間短命花
雲霞空裏擁旌旄
多謝金妃賜絳桃
歸到洞天纔日午
青童閒曬赤霜袍
絕澗高峯斷白雲
清風爲佩織煙裙
玉笙吹落桃花月
萬壑千崖人不聞
綸巾羽扇綠蕉衫
懶把高風混俗凡
雲笈錦函都讀遍

幾時同到積書巖

碧谿半繞玉莎斜處處春雲處處花笑問羅天香發未
侍兒齊候白鸞車

紅雲樓閣迴崔嵬虎豹天關晝洞開昨進下方求雨疏
紫清敕遣鐵車雷

靈藥葫蘆慣繫腰醉歸時有鶴相招罡風亦識飛仙過
扶住空中五色橋

絳節朝回下玉階紫雲盡繞素綾鞵洞天月暗歸何處
十六華陽金字牌

清虛標格自高寒弄罷瑤琴倚石闌螭髓麟脂都俗膩
胡麻爲飯菊爲餐

溟渤茫茫入望無半瓢身共水雲孤月明飛過驚龍睡
爲有瓶中煮海珠

霓佩霞衣拉伴遊玉真亦自愛風流金雞洞口何年遇
笑把桃花當蹇修

琪花翻落紫瓊杯邀得羣真踏月來元碧酒醒天未曉
不知身卧醉仙臺

矚仙貌古似長松蒼鹿銜花兩兩從攜得一枝猿臂笛
隨風吹上幔亭峯

天風瀕洞玉虛寒一朵香雲舞彩鸞光碧堂中金母坐
峩峩不動九星冠

人間睡境總濛濛誰聽天雞叫碧空試向金臺山頂望

海波初湧日輪紅
九室雲開香篆飛
珠簾朝卷雨霏微
琉璃窗外低花影
知是煙霄降紫妃
芙蓉冠子紫煙衣
一笑相逢跨鶴飛
贈我鳳冠仙栗美
海山遊徧不知饑
翠河迴繞玉清鄉
兩兩仙姬豢鳳皇
無底筠籃何所有
琅玕花滿露華香
月映冰肌冷紫羅
下觀五嶽翠嵯峩
挹將斗柄歸瑤島
夜半清寒沈灑多
笑看海水浴金鴉
穩駕文虬禮玉華
八素元經親捧讀
碧琳字映曉天霞

長綿樓上冠朝霞
靜倚雲窗萼綠華
爲憶雙雙玉條脫
一時畱贈在羊家
河源天半盡雲濤
同御長風興頗豪
八鳳珠旂駐瑤圃
開尊不惜酌龍膏
玲瓏珠樹曉來青
調笑梁清隔錦屏
祇爲醉中疎禮數
天教罰作酒旗星
下界求仙不可憑
豈知仙在最高層
冥冥風雨飈輪過
遙指靈壇芳苾燈
月華碧藕浸冰壺
玉戶瑤階赤日無
自是蕉源清冷甚
何須更寫六壬符
霞綃雲帔是新裁
曲曲仙源不易來
昨向扶桑今日返

滿身青雪下瑤臺

清思逸藻入元虛半畝煙霞手自鋤何事玉皇猶未見
不收香案校文書

龍睛仙稻滿天倉粒粒珠璣夜有光不比水仙居澤國
秋來只采芡為糧

翩翩白帝駕雲駟不見皇娥十萬年聞道別來滄海淺
雙眉依舊翦秋煙

紫琅殿裏讀黃庭不覺壺天夜色冥素紙粘來輕似雪
翦為明月照雲屏

萬尺藤蘿蔽月明玉京洞口溼雲生山深并絕青猿叫
但聽波濤石裏鳴

司中上將守天關玉珮霓衣押兩班素女傳宣呼上殿
自稱臣住小蓬山

松濤瀨瀨響方壇桐柏山中六月寒巖下一泓清澈骨
夜深來浴碧霞丹

穿雲忽見聳岩堯同駕青蜺看沃焦滄海桑田非妄語
波濤萬古此中消

崑崙瑤圃樂婆娑悔返驂驅事若何我欲閒乘希有鳥
來聽黃竹白雲歌

碧空千里映瑤林夜靜秋高爽籟深天柱峯頭好明月
不知人世雨潏潏

蜿蜒神物抱珠游欲摘明珠綴玉旒不用相求燒燕炙

五雷頃刻卷靈湫

銀漢迢迢望轉賒當年空說客乘槎天孫夜靜調機杼

織出蓬萊五色霞

驅光逐景白霓衣遊戲三山弱水飛蓮葉舟輕波渺渺

月中載得露華歸

仙府層城隔彩霞璇宮銀榜右英家麻姑昨遣青衣至

邀看唐昌玉蕊花

黃籙爲冠白葛衫雲臺峯下石巉巖道人不惜還丹訣

示我囊中紫玉函

奇松危石轉山坳洞府何人踏月敲怪底夜深龍劍嘯

昨從鐵柱斬青蛟

廣寒清冷桂花香搗藥丁東怨夜長一曲霓裳原絕調

人閒傳下誤明皇

羽蓋霞旂曉日分隨班共謁玉宸君眾中獨賜青鏤管

浴月挈雲寫祕文

蒼蘚如雲石作梯啾啾終日白猿啼山君夜守長生藥

太乙爐中六一泥

雙瞳炯炯映黃眉喫紙爲驢每倒騎得啖青雲芝一朵

千年顏色似嬰兒

阿母前頭郭密香雲衣常佩虎鞞囊今朝侍從朝金闕

帶笑傳呼白鳳皇

廣陵八月怒濤迴駕鯉驂螭踏浪來不許波臣迎水面

笑將羽扇劃江開
 蓮花巾子不沾塵
 碧落飛行自在身
 袖拂白榆歸去晚
 一聲長嘯裂青旻
 朱霞片片映瑤臺
 月下蟠桃帶露開
 彷彿有人嬌似玉
 笛聲吹徹紫雲迴
 扶桑椹熟四千迴
 金骨飛翔遍九垓
 路遇安期前致語
 明朝相訪向蓬萊
 玉女峯前是我家
 荷鋤日采滿谿花
 仙情不比凡情渴
 况有千年冰谷瓜
 恨無錦字寄蘭翹
 戲躡青鸞上玉霄
 為草填橋烏鵲檝
 贈予十幅紫鮫綃

晴空千仞立青岑
 瀑布飛流下澗深
 獨坐蒼松無與伴
 泠泠一撫落霞琴
 天台分手會何期
 海色西風無限悲
 欲倩滄洲轉言鳥
 好從別後道相思
 神仙亦自有英雄
 身跨青驄疾似風
 思射天狼清斗極
 扶桑枝上取彎弓
 霧縠衣輕盡六銖
 花虬七色五雲扶
 琅函手裏瑤光散
 一卷三天豁落圖
 蓮花寶劍影廉纖
 雙袖飄飄拂紫髯
 遙望元洲欲飛渡
 醉眠水底弄銀蟾
 君山一點似青螺
 夜約盧耽控鶴過
 喚取湘靈來鼓瑟

月明環珮出江波

瓊肌蓮臉髮鬢素手常攜采藥籃踏破白雲歸碧落

被風吹下鳳皇簪

千年曾醉岳陽樓城郭人民感昔遊煙景歛然看漸滅

一聲鶴唳洞庭秋

與子逍遙億萬齡笑伊舉酒勸長星共談混沌前頭事

雙手摩挲天柱銘

星窗月戶洞空虛琅簡輝煌映蕊書俯視茫茫煙九點

神仙自是好樓居

月出蓬壺皎若銀疏星遙隔絳河濱凌波小襪飛行急

不染人間半點塵

弱水迴環三島流望中依約見瓊樓浮來玉井蓮花瓣

聊當仙人不繫舟

鴻龍玉狗啟天閭東海團團吐曉暎一尺紫雲遮帝面

近臣始識玉皇尊

路入龜山翠不分藥香煙暖氣氤氳洗花往往逢谿女

五暈春衣翦彩雲

涓涓花底瀉紅泉千个琅玕拂翠煙愛看月明鸞鳳集

鏗鏘音韻羽衣妍

碧桃紅杏四時春嵐彩霏霏踏玉塵親扣丹扉知客姓

手提如意跨青麀

銀河爛漫彩雲鋪桂蓋亭亭映玉壺寶璐衣香吹滿地

汾祠昨夜祀黃姑
白鸞塵尾散香來
王母筵中笑舉杯
入夜鬢然蠶脂燭
燭龍空裏吐樓臺
玉雞初唱日東升
萬仞蒼厓挂古藤
欲識九還丹熟處
金精黃蠱各飛騰
海上琳宮次第開
琉璃碧瓦淨無苔
金城莫攪鴟兒睡
盡是猶龍變化來
蒼茫煙水隔迷津
芳草無風氣自春
別業桃花源一曲
年來賃與避秦人
疑虛殿裏晚風涼
紅桂花間映紫房
特召書仙開寶籙
御爐芬馥玉蕤香

樓閣空中白玉京
飛龍驂駕兩相迎
紫皇敕掌仙官籍
金管親題北斗名
花裏瑤軒夜不扃
麟毫簾卷水晶屏
娉婷不爲春愁坐
仙語泠泠細誦經
玉女投壺帝座旁
赤鸞青鳥列成行
脫臬親見天公笑
不信人間是電光
瓊童雙引五雲車
天路繽紛散寶花
夜靜廣寒宮未閉
吳剛爲我捉金蟾
散髮青童控鹿隨
昔年曾是牧羊兒
躡翻西海洪濤動
十萬魚龍不敢窺
雲冠鶴氅兩瞳青
劒室煌煌錯七星
隻影空山孤月夜

畢方罔兩盡潛形
崑崙頂上御天風
數粒蒼山眼界空
遙指長安如蟻窟
五陵萬古碧濛濛
星漢微橫玉漏遲
斑麟輦降辟邪隨
招仙閣外涼如水
只有琉璃扇子知
翠杓瓊漿細盡歡
銀宮高處不勝寒
太霞一曲歌纔徧
抱得雲和自在彈
開徧三花樹樹秋
綠雲萬頃白蓮浮
九靈少女吹簫過
玩月同登十二樓
紫霄無路可先登
雞犬何年亦上昇
欲識蒼蒼非正色
乘風穩跨北溟鵬

抱一含元道自成
機通眾妙異凡情
世人莫詫神仙幻
戲喝蓮花陸地生
洞天霞彩雜晴嵐
碧樹紅芝映玉潭
園客新分香草種
靈妃無事養華蠶
衣翦龍紗捫赤緜
名登紫府冠仙曹
王公遣在方壺住
東海何人敢釣鼈
靈人浴日向丹池
曉看陽烏出水飛
掠過神洲還入海
江山不改世皆非
一幅龍綃染絳霞
往來弱水不乘槎
新傳弄玉吹簫譜
寫與緱山姊妹家
步虛仙唱隔花聞
座上風吹五朵雲
寄語蘭香珍重處

瑤編常把辟邪熏

樊榭山房集外詩卷中

十一

樊榭山房集外詩卷上

樊榭山房集外詩卷中

錢唐 厲鶚 太鴻

續游仙百詠

斜界銀河低玉繩步虛風露冷如冰月中無數閒田地
更築瓊樓十二層
貝闕龍堂會眾仙赤蛟戲水鼓湘絃一聲裂帛秋波動
驚起江妃不得眠
青鬟爭捧綠瓊車紫府真妃號九華忽聽鸞笙雲際響
雙成笑隔碧桃花
玉卮娘子着雲衫月面星眉貌不凡阿母膝前梳髻罷
綺窗教展藥珠函

樊榭山房集外詩卷中

十一

負軛牽牛曉飲河遙逢帝子道如何仙家夫婦皆耕織
好借天田種玉禾
天上生辰祝紫皇羣仙齊進九霞觴太元玉女催呈舞
一曲霓裳日月長
銀臺金闕盡前緣玉籍書名豈偶然竊藥偷桃應犯戒
玉皇破例恕神仙
三島微茫鶴到遲峯頭閒倚玉桃枝要將碧海長鯨掣
繫取虹蜺作釣絲
風佩泠泠過洞陰飛仙遊戲本無心小餅貯得瀟湘雨
滴下世間三丈深
東溟巨浪蹴遙天浩劫揚塵幾萬年親聽海邊橋石語

何曾流血被秦鞭

獨駕螺舟戲水濱波平風靜月如銀阿誰江上吹橫笛
水府老龍來化人

金根經尾玉名僉赤足身騎八字蟾曉入通明齊候扇
半空星斗捲珠簾

羽蓋鸞車天際來武夷山上起樓臺鳳兒拍板彭昭唱
一曲人間最可哀

三天最恥作頑仙祕檢珠囊盡日研帝有新宮落成詔
書銘拜上彩霞箋

集真島上手譚池鶴髮朱顏坐對碁不遣世人看半局
恐防誤卻采樵時

掛星槎穩海爲鄉珠焰常爭夜月光東到扶桑觀日出
扶桑更比向時長
海上樓船去已遙祖龍那得上青霄下方一點如螢火
道是阿房三月燒
袖拂羅浮瀑布斜軒轅相約看桃花洞中彩蝶車輪大
騎向天邊化作霞
仙官奏罷返名山鳳輦天衢一瞬間武士踏雲紅抹額
真姬曳霧絲垂鬟
深洞煙霞是太初石牀晝捲水簾疎真文一卷虬龍篆
不是人間世俗書
華山朵朵翠芙蓉毛女乘風戲碧松夜靜寒空秋月白

清歌一曲上蓮峯

天上春光世上稀休將紅袖換霞衣遙憐羅郁思凡謫
一墮塵寰尚未歸
珠佩星冠障扇輪雲英年小締仙姻姮娥甘向廣寒老
冷抱蟾蜍不嫁人
嬋娟玉女駕雲軒星漢垂空盡可捫五色雲中仙掌現
巨靈擎出洗頭盆
海上彈琴一葉船赤龍倏忽化紅絃泠泠弄罷水仙調
攫霧挈雲飛上天
偶向扶桑碧海過冰蠶近日始生蛾上元寄語天孫道
織室暫停拋玉梭

蠶樓縹緲在虛空，貝闕玲瓏落照紅。莫怪盧生尋不見，
盡驅三島入壺中。
下縋懸厓上摘星，往來羽服響流鈴。白猿跪獻芙蓉劍，
清嘯一聲歸翠屏。
十二闌干十二樓，閒時登望紫煙浮。媧皇補石猶難到，
一道銀河入海流。
閩風苑裏一春閒，青鳥銜書報阿環。綠髮細梳三角髻，
嵯峩學得海中山。
青松如蓋石如雲，猛虎猶龍洞口分。童子埽花兼汲水，
雙雙盡待大茅君。
冰輪碾破滅清光，修月工人斧鑿忙。玉屑紛紛雲際落，

西風吹下盡成霜。
面面軒窗敞水晶，瓊筵烹鳳膾飛鯨。洪厓莫漫憂沈醉，
還有冰桃與解醒。
彩女遙聽金闕鐘，曉妝初起紫微宮。不須人世長蛾樣，
新月纖纖落鏡中。
聚窟洲邊月正高，夜彈雙禮八琅璈。龍王小女親求曲，
風曳紅衫上海濤。
神霄爲吏不知年，偶謁金鑾獻殿前。已是世人貪莫厭，
休將竹葉變青錢。
駐景何須繫日繩，空歌碧落任飛騰。劉郎辛苦無仙骨，
枉費當年鳳腦燈。

塵網紛紛似繭纏誰知世外有神仙先生學得癡龍蟄
一覺松風太華眠
劉綱夫婦住瓊臺鶴帔霞裙次第裁看兕庭前桃樹鬪
一株逃向白雲堆
吹徹參差白鶴鳴星輿歷歷碾雲行廣寒仙兔春靈藥
丹桂香中玉杵聲
錦字空中鳳口銜靈風吹冷五銖衫相招直渡天河去
片月爲舟雲作帆
南嶽夫人道貌姝新收弟子字花姑碧桃紅杏天邊有
曾見瓊花一種無
萬里清風萬里霞一重樓閣一仙家不知何處飛來鳳

啄落梧桐滿樹花
皎潔秋空碧澄澄玉闌曲曲盡堪憑雲中何處聞雞犬
昨夜旌陽拔宅升
雪藕交梨閩苑栽蘭香生日智瓊來麻姑遣送行廚酒
張碩何曾飲一杯
倒景樓臺曉氣分珠簾掩映紫微君侍兒閒取天衣曝
下界爭看五色雲
星斗宮中月鏡開妝遲不待玉郎催今宵織女成花燭
簇擁仙娥去看來
殿角風生金鐸縱霞光萬縷射虹窗王喬無事吹鸞管
驚起花閒鶴一雙

弄電行雲無定蹤
海天空闊有誰逢
茫茫萬里蓬山雪
無數仙人跨白龍
方丈山邊十畝餘
羣仙相約共揮鋤
秋來種得靈芝熟
卻喜天倉不索租
毛節朱幡事倥傯
餐松餌桂已忘年
天邊日月何曾落
只繞崑崙左右旋
閭闔門前五嶽朝
海神輸貢有鮫綃
奏餘七日鈞天樂
賞盡纏頭十萬條
雲階月地發天香
燭夜花前共舉觴
使酒忽翻青玉案
列仙拍手笑清狂
進饌擎杯滿碧空
玉清高宴紫蘭宮
歌塵灑徧瑤姬雨

舞袖招迴少女風

曼倩歸來十八年
黃冠白袷故依然
追隨翠水瑤池會
還是詼諧謔眾仙
綠樹都栖五色鸞
藏春仙鴨不知寒
棗花桃核尋常物
只食金膏九轉丹
橘中對奕各欣然
笑別巴園直上天
贏得一雙龍縞襪
躡雲踏月不曾穿
嶽蓬仙子字幽蕭
一霎秋空冷佩飄
報道龜山金女到
拜時墮卻翠鸞翹
一種三清旌節花
移根還自地仙家
玉書敕賜青童捧
爭擁韓終白鹿車

琉璃宮殿水精簾
桂影榆花夜色添
寒氣逼人偏獨坐
玉肌那怯雪羅織
紫雲娘子擅才思
吸露餐風姑射姿
霧閣雲窗人不見
衍波箋寫曉寒詩
閃斷芙蓉翠羽旂
雲中鶴駕不停飛
孔昇後乘誰同載
豹尾竿前是玉妃
嵩高夜靜月明孤
石冷泉香九節蒲
聞道叔卿騎鹿到
王興峯頂笑相呼
水仙去謁洞庭君
珠箔瑤窗寶瑟聞
最笑座中窮柳毅
纔攜龍女便行雲
芙蓉城裏五雲樓
夜共瓊英跨鳳遊
爲報石家多置酒

玉宸新拜醉鄉侯

萼綠安香坐玉階
藕絲裙覆蹋雲鞵
眾中鬪得金光草
輪卻雲鬟玉燕釵

生洲飛步拾紅蘭
金醴餘醺尙帶酸
袖裏盛將滄海月
夜深驚起玉龍看

新授華陽司命君
青旄紫蓋氣氤氳
碧瑤箱鎖飛仙印
一軸三霄九錫文

碧雲城外砌玻璃
登望蓬壺小欲迷
誰喚老蟾歸海底
桃都山上一聲雞

居巢笙響晚風和
忽聽雲中度玉珂
卻是伶倫纔謁帝
相將嶰竹倚清歌

青霞爲佩月爲鈿獨坐花陰謝自然一卷黃庭纔誦罷
玉爐猶有未銷煙
函谷東來路渺茫流沙西去似天長而今講道中黃闕
猶湧成都玉局牀
邀得青牛駕鈿車椒庭列坐酌流霞仙人舞罷山香曲
落盡滿庭琪樹花
羸娥舊是鳳樓人飛雪丹成不肯勻笑語蕭郎天上樂
玉簫占得幾千春
雲表真人絳節回水中仙子綠窗開梅姑繡履乘潮去
江女珠璫弄月來
窈窕青童鬢掠鴉翠簾不捲煮仙芽夜深天母裁宮錦

半是紅雲半是霞
蟠桃一熟歲三年纔是雲華攏髻年底事驚心封不住
花閒故惱鳳皇眠
落盡殘星海色明天風浩蕩卷霓旌朝元跨鶴歸來曉
霜冷石樓鐘自鳴
冰簟瑤牀夢乍醒玉童持簡進雲屏上方割取乖龍耳
種出鍾山李似瓶
羣玉山頭策府開羽陵粉蠹化香灰瑤篇寶軸三千卷
穆滿何曾解讀來
九館仙人拜大夫射鳥斫兔盡癡愚長生錄上添名字
只得龍髯第一珠

島上瑤宮罩碧煙繞山弱水浪翻天羣仙盡駕鸞輪渡
獨掉蓮花破鐵船
青瞳綠髮老浮邱常想飄飄伊洛遊今夜縱山明月好
鳳笙吹過碧雲頭
仙膳琳廚翠釜香真官惟奉紫清皇已攜北斗斟天酒
更弄南箕簸玉梁
百丈長虹繞繡楹半天風雨散班聲紫宸闕下晨趨出
東望咸池拜日兄
仙娥結束學嬌嬈裊雪縈煙一尺腰東海冰綃雲漢錦
九光燈裏舞衣飄
俯視青冥啟笑顏蟻封隱隱九州山滄桑更變成兒劇

杯水盈虧一瞬間
大羅天上色空青嘖雨雲鬢躡鳳翎正遇玉京仙史至
乞將羅襪爲書銘
朱陵洞底透湘風乳滴仙花蝙蝠紅玉簡書投蒼水使
青虬騎入古潭中
司書仙女號文姬臉帶霞痕不埽眉召寫玉樓新記畢
譔文名著隴西兒
天風颯颯雲盤盤麗英夜戴晨纓冠前驅九龍十二虎
絳河清淺生微瀾
雲翹攜手夜相偕仙樂泠泠作隊排月府星垣盡宮殿
琉璃一道是天街

一片青霞渡海來，神山下見紫瓊臺。
綺窗雲影呼鸞起，花裏洞門深自開。
杖頭拄破白雲痕，離地天通有一門。
猿鶴蟲沙飛劫盡，茫茫何處覓曾孫。
御風微縹碧烟裙，笑翦湘天吸彩雲。
遠望層城花靄靄，駕虹去拜紫陽君。
霞漿一勺鎮青春，猶戴華陽道士巾。
游戲尙嫌瀛海窄，更鞭鸞鳳叱黃麟。
夜向藥樓邀小玉，傳書鶴使路迢遙。
忽聞阿母多呼喚，閒殺仙郎碧玉簫。
鋤雲種得玉爲田，服食瓊腴凌紫煙。
曾向梯仙國中住

吞殘紅日不知年，珠閣深深鎖上華。
瑞雲繚繞綠窗紗，忽驚吹落沈檀雨。
盡是羅天四色花，餐霞爲食枕雲眠。
種得峯頭十丈蓮，不是凌風生羽翼。
塵凡那解識飛仙。

樊榭山房集外詩卷中

樊榭山房集外詩卷下

錢唐 厲鶚 太鴻

再續游仙百詠

有序

曩作前後游仙凡二百首前游仙已雕板不揣荒鄙
頗有嗜痂後游仙藏篋中未舉示人暇日展玩自愧
凡俗於仙境猶有未盡因刻意冥搜誓脫故常復成
百詠昔謝逸作蝴蝶詩三百首人呼為謝蝴蝶世有
知我者其將以予為厲游仙乎

宴罷瑤臺酒半酣海天一色染微藍蓬萊頂上麒麟客
界破滄溟碧玉簪

香風吹散紫梨花拂過瓊宮桂影斜空裏銀光似流水

潛翁夜弄白蝦蟇
神馬生猶控玉童
三回繞日勢追風
王公嗔喫芝田草
新種龍芻翠島中
阿母親教嫁玉郎
飈輪吹送杜蘭香
璿宮織得秋雲帕
褰贈瓊丹似紫霜
夜宿明晨八景城
眞香焚盡說長生
琉璃牆壁不知夜
白鳳玉鸞都暗驚
騎羊拂袖上綏山
朱草紅蕤滿路斑
折得金桃未曾食
東風笑待赤烏還
髻縮飛仙青錦裳
閩風筵上舉金觴
不知傾盡瓊蘇酒
嚼爛紅霞睡阮郎

乘風笑踏玉蟾蜍
訪道參師遍紫虛
琅碧溪頭桑樹下
飛龍親授太霄書
玉貌壺公翠彩眉
碧桃花發遠相期
騎來白豹偏饑渴
教飲紅泉嚙紫芝
太極夫人插玉釵
紫清宮裏候清齋
忽逢歸路雲霞重
擁住青瓊飛鳳輶
白羽霓幢一色新
八溟山上校羣眞
青虬扶輦裴君至
金簡新除侍玉宸
負局先生綠髮長
曳雲瑤佩韻丁當
只因磨得姮娥鏡
白兔傳將搗藥方
一片眞風花氣飄
三層玉殿近彤霄
何人低唱元雲曲

聞道東皇散早朝
碧霧衣裳青羽裙
驂鸞道是紫元君
欲過蕙圃尋瑤草
早有香來透五雲
鬱鬱紅雲鎖翠樓
玉璫敲戶暫來遊
階前白鵠閒教舞
狼藉芝花曉未收
迎來玉仗白羊公
手捧龍泥碧檢封
夜扣九關門尙閉
滿身星影立雲中
昨夜元洲降碧霜
綃衣新染十分香
千年白橘初成子
未獻真妃不敢嘗
碧谿流水泛雲花
此是滄浪少女家
夜向瑤池思阿母
祥風吹上紫鸞車

翰寥館裏小天青
夜誦金璫玉珮經
侍立瓊童無一事
隔花閒數絳河星
喚起青龍駕玉鞭
井公相約到瓊田
圍碁一劫三千歲
贏得桐山度厄錢
長桑公子服紅冰
閒向崑崙試一登
三十六天花底見
瓊樓玉宇碧層層
金尾毯毳鳳哺雛
滿衣紅露落如珠
靈香只在闌干外
雲母屏空看似無
弱海相逢袂便分
欲將書札寄王君
須邀班孟嚼雲墨
噴紙盡成瑤篆文
金波一片海光生
天路常隨六甲行
白虎鼓琴鸞唱曲

勸君須盡九霞觥
冰裳染得萬峯青
瓊樹風高吹夢醒
碧海邊洗明月
滿天星斗冷冥冥
靈壽青童偶共攜
翠龍雲冷卧前谿
紅霞蒸透桃花樹
不覺玉山歸路迷
空洞笙歌奏六音
碧堂迴繞五雲深
虛皇親召金妃舞
花鳳前頭拍不禁
瀛海波高雲影寒
方平夜戴七星冠
麒麟本是尋常物
祇供行廚作脯餐
淺碧壺天扣不開
瑞煙長護七靈臺
青田鶴使先通信
知是八元仙伯來

鞭鳳來過日未斜
粼粼碧水護金沙
倚風一吸蒼龍盃
開盡蓬萊紅杏花
王公畱客吸霞漿
洞裏春閒白日長
歸去天風刮雲響
吹翻紫水污衣裳
月影霞光亂不分
煙衢輕蹴玉絲裙
九芝蓋底遙相望
不是茅君定許君
金書親賜住瀛洲
曉喚芸童到上頭
芝穗藤花須細掃
玉皇明日要來遊
萬年青鹿七星毛
騎出谿頭摘碧桃
背後從行雙玉女
煙絲新刷翠鬟高
風雨冥冥碧玉壇
元洲長史近闌干
草成河伯新除詔

賜與黃龍潤筆乾

青谷先生隱太清朝元初罷返瑤京不知何物充朝膳
爛煮金蔬玉菜羹

碧紙琅函一幅書相邀涓子到方諸往來不用三青鳥
自有騰空赤鯉魚

玉苗瓊藥種來新多是寥陽殿裏人只有碧池無景色
鮑姑乘雨送香蘋

藥珠樓閣壓紅雲侍女燒香遠近聞新到仙姬參拜了
教開青笈賜真文

九雲冠上綴三星小字曾呼宛絕青吹裂中天寒玉琯
白龍斜立碧煙聽

月戶珠簾上玉鉤青琴仙子夜深遊冰絲彈得清商曲
吹下人間萬木秋

王母生辰捧玉杯酒清香發上瓊臺鈞天初奏掀雲外
九聖七真騎鶴來

晝長懶去展琅函小洞花前玉手摻搓碎明霞壓紅綫
安妃喚繡鳳皇衫

秋到寒蟾彩暈明五雲深處桂香生跨龍飛過清虛府
聽按霓裳第幾聲

天葩不與世間同樹樹長春一色紅更有紫河香十里
荷花開向雪霜中

羣真直宿紫微旁宣召明晨夏侍郎擡起五雲簾一半

霞衣染得九天香
教炊金竈煮胡麻
雲樹重重是妾家
一別劉郎無近信
洞中冷落碧桃花
月明花暗路遙遙
玉女閒吹九鳳簫
等得裴郎就鸞駕
穿煙珍重謝雲翹
新拜蓬萊佐命卿
玉童羽蓋往來迎
夜深笑倚青鸞背
拏住金蟾不放行
瑞霞爛漫八風涼
絳闕門前下鳳凰
不許侍兒敲玉節
恐教驚動紫清皇
青翁爲厭侍瑤京
移住西明三素城
買得瓊腴田萬頃
閒時卻喚玉龍耕

幾度看生滄海塵
風前倒着紫綸巾
碧騾何事不歸去
水滿玉谿瑤草春
小有君王跨鶴過
洞天雲滿露香多
花閒眾女調笙琯
正唱春波一曲歌
記得雲軒過海時
水平風靜碧淪漪
白螺素女來相候
擎出明珠龍不知
空裏飛書寄洛公
雲箋吹落碧天風
海波爲問曾乾否
要種金桃萬樹紅
太素真人不出遊
瑞花瑤樹隱丹邱
眠雲野鶴夢纔覺
已是人間千度秋
新壓瀛洲碧玉漿
麻姑作主共傳觴
紅鸞飲罷催歸去

爛醉不知風露涼
洞裏瑤窗六扇開
落花一片繞谿迴
熊盈娘子閒何事
親把黃金裕襖裁
七瑤宮裏賜金花
一道明河簇絳霞
只有成公親被召
相隨帝子降鸞車
山圖寶馬錦障泥
歷遍崑崙弱水西
日暮搖鞭歸紫府
瑞雲影裏一聲嘶
九天風冷月芒芒
吹薄龍絲一握香
碧落夜深秋似水
來邀青女覓甜霜
新梳一尺綠雲鬟
嚼藥餐花盡日間
阿母爲嫌塵世窄
智瓊無奈憶人間

著罷青裙拜木公
洞天十二碧玲瓏
雲窗女伴暗相識
知是西池白玉童
弱河風靜浪千層
一朵青霞自可乘
拍手笑呼鳧伯子
同遊翠水采秋菱
清瑟閒彈五十絃
雲心飛響瀉流泉
無人解聽紫霞曲
鶴唳鸞吟月滿天
雲輶深擁魏夫人
前導雙雙五色塵
忽見桃花開海上
三千年又一回春
珠館春寒鎖玉扉
落花飄著上清衣
金盆曉漱寒瓊水
灑向人間作雨飛
瑤樹離離月色明
偶隨煙駕宿三清
花間一夢誰驚醒

北斗迴環夜有聲

碧苑青林一半閒
尋常移得麗農山
曉來怪底雲衣溼
添卻窗前綠玉鬟

八公顏色似桃花
共坐青牛白鹿車
欲訪故人何處所
雞鳴雲外是劉家

茶姥烹茶別有方
東皇畱客試教嘗
玉壺不住雲霞沸
煮出瓊華滿盞香

玉案旁邊小侍書
金鵝雲髮一頭梳
朝來檢錄三天事
密記琅玕滿碧裾

昨日騎魚白海過
采桑陌上遇青娥
自言厭著天孫錦
要織冰綃共雪羅

閒采雲山紫葛花
露苗煙蘂月初斜
饑時白石和泉煮
飽向峯頭漱曉霞

安公朝謁玉清歸
脫卻霞霄無縫衣
騎得赤龍何處去
閒遊一任九天飛

一曲滄浪別有天
玉花金草滿瓊田
連朝鳳駕雲輶倦
聽向扶桑背日眠

蓬君年少最風流
新賜天花插滿頭
笑指紅雲歸去路
玉華正倚十三樓

曉喚青鬢煙景殊
瑞煙溼透紫羅襦
東華宮裏春常在
撲地香雲何處無

夜宴瓊臺飲未殘
星河流響近闌干
燭龍早向東方駕

照破玉杯春酒寒

昨夜相邀宿月宮素娥玉珮響丁東白鸞作意婆娑舞
身在琉璃世界中

碧樹風清拂玉虛八靈道母鎖雲居明朝欲約蓬萊會
夜寫青瑤小篆書

一笑騎鸞下碧城偶然相遇帛先生東風不記何年別
揜袖爲君吹玉笙

瑤水如空噴錦沙客星無路可通槎醉嗔一隊長生鹿
銜出洞中紅玉花

西華侍女董雙成閒共蕭郎作伴行贈與千年駐顏藥
願郎珍重莫嫌輕

一片空歌入太微月寒花露滿身飛玉妃悄向青童語
遊遍煙霄侵曉歸

芝甲瓊花發好春衛卿許椽最相親全家容易登霞籍
不比人間學道人

雲林洞口晝冥冥鶴睡瑤屏靜不扃莫道往來煙路遠
碧天只隔水晶屏

紅霞爛爛染衣裳回首滄溟路更長爲覓董君相借問
不知杏子幾時黃

夜上樓頭碧霧空寥天吹動八絃風飛瓊笑拍闌干望
月殿雲階倒影中

姑射真人戲紫霄天風冷襲綠雲袍玉皇遣降豐年雪

都向青鸞羽下飄
采樵因過碧海頭興來嘯父喚同遊晚風更上崑崙頂
鐵笛一聲無限秋
齊隨霓節上瑤壇絃管泠泠奏未殘獨有茅君親拜賜
眾中暗認藕華冠
去覓元君偶被畱玉膏千斛校觥籌更呼小鳳筵前舞
月轉河傾不肯休
湘鬢催喚范成君結束彤雲六幅裙教唱步元新法曲
此聲天上未曾聞
花開花落本須臾直得霞翁一笑無眼看扶桑東海上
幾回生葉幾回枯

青林紫草伴長春不識人間有笑顰欲取水中龍子戲
湔衣因到玉谿濱
手翻鸞珮下金臺寂寂雲窗午未開正是紫妃新睡覺
聞聲始識鳳仙來
雲箋五色展青箱詔寫瑤鐫向碧堂龍篆芝書人不識
墨花飛出滿天香
渡水乘花共踏歌顏雲高髻碧峩峩戲將玉尺量東海
更比當時淺許多
鳳輿海上卻回時青鳥傳書寄所知我有遊仙三百首
不須重唱鴛鴦詞

樊榭山房集外詩卷下

曾侍東皇太乙前酒龍謫下不知年花陰一覺游仙

夢行遍壺中小有天

噓吸乾坤瞬未移下窺濁界息相吹海流不到天無

底始信三山未足奇

西溪漁者自題

游仙詩三百首蓋先君子少作也以偶爾託興未嘗

實版集中小子黼薰襲篋衍每一敬展手澤如新泣

然何已同學鮑君以文績學嗜古亟請開雕不特敏

求之足當實爾詩人不匱之遺矣黼其能無興感哉

謹書末方以識鮑君用意之厚云乾隆辛巳中春志

黼識于樊榭山房

余束髮喜學爲詞同時有洪稗村沈柳亭輩嘗爲倡和
彼皆尙花庵草堂餘習往往所論不合未幾各爲他事
牽去出處靡定不能專工於一今二君已化爲宿草余
猶視息人世間作倚聲之歌幾無一人可語者去臘於
友人華秋岳所讀樊榭高陽臺一闕生香異色無半點
煙火氣心嚮往之新年過訪披襟暢談語語沁入心脾
遂相訂爲倡和之作共得題如干并注以調名乃不數
日兩家已各成其半會余適有白門之役孟夏解纜羈
留吳苑者二旬又足成之頃寓秦淮樊榭書至知前後
俱削稿復合以平時所作付之梓人先以首卷刻成者
寄示迴環讀之如入空山如聞流泉真沐浴於白石梅

夢梅山房集外詩是齋
溪而出之者噫舍紫山而外知此者亦鮮矣獨余沈酣
斯道幾五十年未能洗淨繁蕪尙存故我以視樊榭壯
年一往奔詣寧不有愧乎時康熙六十一年壬寅白露
前一日同里紫山徐逢吉題

詞調六百六十體凡千一百八十有奇一調有一調之
章程一體有一體之變化作法既殊音響亦異殆難於
詩遠矣余友徐紫山嘗教余作詞謝不能也厲君太鴻
於詩古文之外刻意爲長短句拈題選調與紫山相倡
和大約懷古咏物之作爲多數月之間動成卷帙聲諧
律叶骨秀神閒當于豪蘇膩柳之間別置一席至於琢
句之雋選字之新直與梅溪草窗爭雄長矣余學詩垂

四十年尙不能工太鴻工詩工古文而琴雅一刻各極
其妙人之智愚何相去之夔絕也石倉吳允嘉

詞於詩同源而殊體風騷五七字之外另有此境而精
微詣極惟南渡德祐景炎閒斯爲特絕吾杭若姜白石
張玉田周草窗史梅溪仇山村諸君所作皆是也自是
以還正不乏人而審音之善二百餘年以來幾成輟響
近稱西泠詞派或踪跡花閒或問津草堂星繁綺合可
爲極盛迺緣情體物終惜其體製之未工獨吾友樊榭
先生起而遙應之清真雅正超然神解如金石之有聲
而玉之聲清越如草木之有花而蘭之味芬芳登培嶁
以攬崇山涉橫汙以觀大澤致使白石諸君如透水月

華波搖不散吳越閒多詞宗吾以爲叔田之後無飲酒
矣樊榭天才軼舉靡不洽習而志尙高遠泊于榮祿其
與予同寓廣陵時當日斜花外必相約爲倚聲往往予
未及脫稿而樊榭點筆已就予輒爲之罷去此卷中懷
古咏物諸篇皆與同里徐丈紫山酬唱者爲多予旣滯
淫旅人生意消削從塵土挈屑中手把是編恍鉛槧之
周旋感素琴於秋思傍徨弔影殆若異身有不禁爲之
掩卷憮然也康熙壬寅立秋日玉几生陳撰書于眞州
之玉淵堂寓館

余友太鴻秋林琴雅之詞質也靈虛學也膏腴才也飲
飛如玉光之陸離劍花之參差如是而命之爲詞苟舍
是其將焉如雖然猶有說夫詞南唐爲最豔至宋而華
實異趣大抵皆格于倚聲有疊有拍有換不失銖黍非
不咀宮嚙商而才氣終爲法縛臨安以降詞不必盡歌
明庭淨几陶詠性靈其或指稱時事博徵典故不竭其
才不止且其間名輩斐出歛其精神鏤心雕肝切切講
求於字句之間其思泠然其色熒然其音錚然其態亭
亭然至是而極其工亦極其變苟舍是無或取焉今太
鴻之詞不必梘其貌蠟其言抽其關鍵拔其轅轅上下
五百年居然獨樹一標壇矣余弱年從羨門侍郎竹垞
翰林論詞嘗取宋末諸家爲矩矱久竟棄去近與太鴻
還往回理前緒不禁嘖然一笑思效邯鄲之步也康熙

壬寅清和月鶯籠生吳焯書

歐陽圭齋謂雅卽雅鳥之雅以其聲能動物也詞之聲生于宮羽而動物者必雅余與樊榭交垂十五年見其偃蹇佗儻不廢文史而感時覽物託寓微至詩所不盡必形之于詞上者海山縹緲之音次亦不減游春綠水之奏聞者意消神往直與鄉先輩清真玉田山村句曲諸公相後先矣符曾幼魯題

淡而彌永清而不膚渲染而多姿凋刻而不病格節奏精微輒多絃外之響是謂以無累之神合有道之器者詎止有井水飲處必歌柳七詞令市伶按拍稱好乎意田趙信

是集名秋林琴雅計一百六十闕先生三十以前之作也越十九年手編樊榭山房集錄五十六闕有閒易字句之處餘一百四闕不復存錄而後進得殘篇賸句往往等諸吉光片羽矧全帙乎爰以集外詞附于後光緒十年甲申孟冬同里後學汪曾唯

題辭

樊榭山房集外詞卷一

錢唐 鴈 鶚 太鴻

秋林琴雅 原四十七闕編入
正集二十四闕

眞珠簾

雨夜汪青渠齋中看芍藥

疎寮自占藏眞島棟風遲不覺花深寒悄背檻試懸燈
護幾枝嬌小板觸鬢絲禪榻外是罨栗梢頭初好相惱
又香潤人衣雨聲吹到 深意不爲留春爲飲盟吟社
不教虛了舊種記銅駝料此情多少歸帔拖霞休贈別
便一任綠房迎曉買笑怕破霽簾痕添些蜂鬧

天香

浴佛

櫻溼猩紅筍垂鴨綠今朝四月初入調御生時淨居降
處乍試銀盆珠沫梅檀沈水正小喚廚娘煎歇灌頂身
雲吹散盤盤洗出螺髮年時暗盟重撥拜花龕長生
私乞心字濃燒屏底更衣香辣又是者番情緒愛淡裹
輕梳碧山抹寫幅金經小名自跋

臺城路

蠶

晶鹽水浴齊生日新排曲房深護纔細髮梢忽圓指節
箔上低昂分貯一春心苦也不為漂花怕他風雨到得
紅時柔桑畫眼已空樹雪絲漫縷千縷試小留蛹母

配勻蛾父溼黛初描閒愁易結滿紙彎環眉聚吳中忌
處早繭獻雙功野祠簫鼓贏得秦郎碧窗聽軟語七日前

老謂之紅蠶出坤雅蛹母蛾父出荀子秦淮海集婦善蠶事故作蠶書

玉闌干

金沙灘荷花

流金橋下清冷水記得小船曾樣浦風有意扇紅妝先
催放兩三冷蘂露翻荷背明珠墜算粉裙飄揚似此
去年花裏去年人空無言竚立沙嘴

滿江紅

鄭義門自號五嶽遊人索予題其紀遊畫冊
英氣如君駕千丈蕭森翠寒尋常肯塵中溷迹負卻躋

攀屈子遠遊奇服在尚平婚嫁此身閒記殘冬向我話
仙蹤無數山青岱去玄嶽還登二室俯轅轅看玉蓮
幾瓣寒下孱顏太白風雲生腳底清涼冰雪現眉端詫
明年又擬訪朱陵招紫鸞

又

錢塘觀潮追和曹侍郎韻

何處神龍忽翻動千尋銀闕乍龕楮中間怒吼一痕如
髮倒捲青天吹海立橫驅白雨連山發被此聲日夜洗
句吳淘於越奇險勝瞿塘雪傾城看中秋月壓秦皇
強魄至今驚絕隔岸迴波搖未定西興漁笛悠揚歇想
錢塘破陣萬靈歸粉幢節

一萼紅

雁來紅

夕陽中正蕭蕭颯颯一陣打窗風黃木犀殘碧牽牛斂
天意妝點秋容漸商略丹砂換骨扶碧篠渾學醉顏濃
怪石苔嵌疎汀水淹滅映蒙茸遙夜初鴻飛度寄江
南芳信月底相逢是葉非花將花做葉今後輕薄霜楓
爲最憐心情難老步微陰閒翫藥闌東寄語相思人道
莫誤題紅

月華清

元夕同金小鄴賦鞦韆燈

水影吹香花光蕩月燭叢光影如許何處留仙便擘皺

李梅山房集外詩卷一
三
裏留住栽畫架合傍星橋曳綵索還依燈樹飄舉似輕
身燕燕賺他遊女誰信巧如丁緩早貯就眉鈿翦成
腰杵送過牆頭疑是夜珠來誤憶舊日嬉戲波心占盡
了金明池路歸去有紅船次第更闌簫鼓

摸魚子

宛陵梅文常爲子寫西溪卜居圖因題其上
兼懷尊人耦長先生

問誰移亂泉一曲藤橋宛轉河渚青羅簪髻看皆好景
歷斜遮疎樹橫斷渡指牒子如鳧小槳輕搖去蘆花深
處笑蟹籩魚牀何時料理始有此家具平生意瀟灑
愛山真趣年年踏徧煙雨百弓沙嘴閒田地輪與眠鷗

翹鷺呼燭語仗濃淡香螺寫出無聲句故人閒阻更長
憶梅翁小溪春穀獨速短蓑舞

應天長

年年不到湔褰水懊惱越梅猶病齒智瓊姨飛燕姊勻
掠鬆蟬知舊事小長干千萬里枉說門前梧子又是
孟婆風起熏香偎翠被

八聲甘州

京口

閱興忘多矣此南徐我今逐沙鷗過建陵草色練湖柳
影春事都休好似秋容慘淡吹笛夕陽樓樓外茫茫水
著箇扁舟綠鬢看山未老縱凌雲意在漂泊應羞喚

玉龍起舞爲洗古今愁最忘機不如漁子向晚來和月
一竿收聊同宿江烟江樹也是風流

買陂塘

荷錢

皺微波紫屏風外莢根絲脆初裊田田點點黏天影不
覺千紅如掃縈網藻訝水蛭翻衣只認鯨文小碧圓多
少問覓藕何時見蓮幾日難買越溪笑風亭畔曾約
玉纖親拗未堪低障斜照鵝兒欲啜清光破偷眼依稀
同調空懊惱誤鉤線穿來枉費江姝巧疎簾興好待鈿
扇高擎象筩半捲卧聽雨聲鬧

蘇文古
錢名

探芳信

廣陵雨夜同故人徐紹武汪抱樸集飲于許
渭符獵微堂以藏花爲令各大醉明日抱樸
將歸武林矣

冷雲墮苦燭暗梅霏堦喧蘚破約舊愁今雨安排醉鄉
可風花身世渾無定拌向花裯卧儘淋漓帽落青枝殘
搖紅朵珍重此閒坐要句泊心旌琴開眉鎖還剩杭
州衣上酒痕澹只憐曉漲金蕉外弱橈飄然過照相思
一點蘆中夜火

祝英臺近

黃薔薇

軟屏深香霧重春已欲歸去短刺鉤春更翦柘羅舞幾

回惹卻斜陽蒙將初月但吹送麝塵侵戶 水邊路柳
花裊容柔條相看色如許點染齊紈添了小鶯語故人
昨有新詞殷勤盥手曉傾下金盤仙露

清平樂

陳楞山松泉試茗圖

空煙吹翠峰腋雲生細消得清涼剛斛二句破松根殘
睡 幾年淮左羈愁何時嘯侶林邱記取雪殘歸棹期
君第二泉頭

臺城路

懷下若舊遊寄金壽田

船窗涼燭分攜後夢遊未忘清遠柳髮垂溪山螺過雨

陳帝宅邊曾見吟情恨淺但共坐深宵忍辜茶盃誰料
今年又憐梗跡在隋苑 蘋洲那時初返笑風流不減
綠陰春晚月墜江空雲籠岫小無復焚香書練憑高望
斷悵如此幽尋頓成星散待續前期葦閒誰是伴

惜紅衣

賦團扇上蓮草美人

月裏盈盈風前轉轉嫩涼吹送細熨桃鬟羅衣淨無縫
東牆未見容易得情田先種飛動輕削楚腰比桐花么
鳳 天然壓眾愁眼啼蘭無言正如夢纔離小草半面
漫邀寵別有寸心通處拾翠水邊曾共恰恁時憔悴湘
簾畫屏深擁

秋霽

金山寺

樹影中流走萬里江聲地軸吹轉香塔擎秋翠蓬穿水
化人別開宮殿古臺一半倚空閱盡魚龍變客思倦長
是潮生風熟布帆遠回首悵望北固南徐六朝銷沈
鈴語悽斷問何如還留玉帶禪心孤月鎮相伴清曉碎
霞飛近岸郭公墳上日日暗露沙痕槎搖驚起叫羣棲
雁

向湖邊

拜句曲外史墓

菌閣煙銷篋樓塵鎖片片冷雲疎木人似秋蟬渺餘音

空谷恍昔年吹斷瑤笙寥天回首凍草此時纔宿風翦
蓉裳恐難禁幽獨歸去瀛壺便覺吟朋俗誰再倩好
手圖孤清冰玉一任香狸竄殘碑深竹理哀絲漫鼓懷
仙曲還如倚三尺細泉看夜綠遼羽重來笑飛光何速
如夢令

庭下丁香千結錫毛文青鳥不來愁絕唐昭宗無語倚屏風李珣正
是銷魂時節毛熙震離別離別韋處物惆悵曉鶯殘月韋莊

翻香令

題趙意田倚樓圖

斷雲依水晚來收辛幼安幾行征雁下汀州趙旭江之外吳潛山
之麓王特起好江山何事此時遊周密醉香空斷楚天秋馮子振

故人多在玉溪頭元好問尊前月沈會宗聞遙笛呂渭老這風情都屬

趙家樓黃昇

探春慢

孤山訪梅

清淺湖波回環孤嶼落日空亭凝碧凍鶴無聲衙蜂罷
鬧忽有苔枝橫出留取古時香渾不是古時春色過牆
料峭風來吹花開了還側何意相思今夕看似淡如
無半闌疎白睡起推篷酒醒聞角消受高人吟癖水月
更交光仙袂在玉壺塵隔禁住新寒幾生纔此修得

沁園春

塵

微步凌波清歌繞梁凝芳暗低記羅窗未拂簪花偷學
鈿箏初滿藉草慵攜依約爐邊悠揚簾外欲辟還宜舊
導犀風尖甚上平臺望處眼纈都迷浣衣苦費柔荑
正願効輕微安足辭笑軟紅碾玉橘中戲賭深黃篩麴
柳際斜垂擣麝成香逗煙生綠硯匣封時句嬾題銷魂
也覓去時蹤跡休掃桃溪江夏王蕭鋒窗塵未拂畫塵上學書見南
史樂器塵滿見隋書沈約有辟塵爐韓偓
詩紅簾不受塵石季龍有芳塵臺鄭源婢萱草浣衣云郎君塵土太多令人手皮
俱脫賂賓王咏塵詩願言心未翳終冀効輕微橋中叟賂玉塵三百斛麴塵深黃
色也温庭筠詩擣麝成塵香不滅李賀詩被帳逗煙生綠
塵柳宗元詩硯匣留塵盡日封韋莊詞去路香塵莫掃

卷之二

樊榭山房集外詞卷一

樊榭山房集外詞卷二

錢唐 厲鶚 太鴻

秋林琴雅 原三十七闕編入正集八闕

驀山溪

鄭菊山翁諱起卽所南之父有水南半隱在清波門外長橋

湖南深曲元是漁樵社欹壑架長橋綠陰中幾椽秀野
今來怊悵不見岸烏巾衣砧沒釣船空牧豎收羊馬
風蘭幾葉應看佳兒寫古月墜空山似飛來冬青樹罅
無多半隱幽意自乾坤休憑弔半閒堂螢火明秋夜
祝英臺近

蛙

鴨頭搓袞腰染鼓吹鬧南浦叫暖喧晴似把好春訴添
他一兩三聲荒腔斷港為幾陣清明時雨 苦無主最
苦別館華林跳梁小池聚到了燈昏掩重門深戶漫勞
閒聒空塘忙催春老又黃卻菜花無數

高陽臺

湖上感舊

野水垂陽古牆蒼薺傷心清淚偷沾前夢無憑閒情曾
過鶯簾狂紅只在西湖路記來時月細風尖最情忒同
問青旗同譜烏鹽 酒人轉眼多星散任塵埋蠟屐網
裏書籤能話相思憎他雙燕呢喃平生不信潘郎鬢到

而今鬢也絲添更厭厭葉暗空庭雲墮晴簷

天香

龍涎香

苦竹潭深枯桑島遠靈姝秋卧無味袞霧醒初戰沙去
後剩得唾痕凝紫魚衣試採重與和宮隘花水天上梅
魂乍返温磨似垂織尾 并刀斷雲暗遞認分明蜃窗
燈穗一縷閒情如舊煖金難寄焚出青蘆雨裏伴小舫
涼聲靜敲碎松石圖開餘煙半紙

霏雪錄尤溪縣西苦竹潭中多
龍涎梁四公記洞庭山南龍穴
通枯桑島雲林遺事倪元鎮為催科所擾逃去匿菰蘆中焚龍涎
香何敬仲詩云夜雨推蓬寫松石焚香何處獨題詩蓋紀實也

摸魚兒

蓴

過清明第三橋畔香鈿半漾平碧纖痕雉尾浮青紫漫
把露葵呼得炊小摘有盪漿人人黃玉嬌風色葉圓似
拭正觸撥柔情千絲萬縷到手不堪織 前期遠會共
飄零詞客酒闌羹送冰液沈郎自許能知味千里還伊
吳食秋思寂但望斷鷗鄉煙外愁何極幾時肯憶笑鱸
斫蓬池不如水際采采趁今夕

齊天樂

蟬

青林響接炎光永垂綫不沾塵土刻鈿仙形貯風清腹
笑倒世閒兒女疎枝過雨又咽斷殘聲暗移深樹涼碧
勾雲高情那信雀相妒 曉園莎露乍滴問何人咏得

一翦輕羽趁夜潛飛臨妝欲動好助綠窗眉嫵長嘶正
苦憶舊日瑤宮孟家曾顧淺畫生衣冷飈吹不去

雙蟬目爲子孟
家蟬見可談

元祐子孟
后衣畫

又

前題

一番枝背旁鳴起池塘頓添清絕竹翠捎空梧陰避景
占了嫩涼時節偏驚遠別是催落殘陽又催殘月獨韻
么絃更無人爲表孤潔 桃笙夢回靜聽每星河夜淺
餐露聲歇耀火休驚柔竿漫試吟到秋來悽切西風再
熱候緩蛻冠花舊愁重說剩有癡情繞堦尋翳葉

在明其火曹植蟬賦怪柔竿
之冉冉兮還微黏而我戀

水龍吟

白蓮

綠羅萬笠高低姑山雪擁橫塘路鉛紅浣褪娟然幽意
最宜涼雨葦亂萍疎銀囊獨立羽衣來暮觀鱗鱗波底
魚雲粉朵如明鏡添妝處多少輕舟溪女歎年時嫩
瓊誰主襜褕開徧滿陂照影舊遊權阻香遠堂空舞綃
零落含悽無語念玉笙纖手與花一色浥殘清露清熙九年中秋

賞月香遠堂池中植千葉白蓮上皇召小
劉妃獨吹白玉笙霓裳中序見武林舊事

桂枝香

蟹

江楓落早正執穗侵星睜畔爭擾不住腥泥郭索臍翻

紅蓼疎簾半映圓沙細聽燈邊雪聲鳴曉漫愁翦網骨
清沫白葑湖秋好憶月底糖霜乍擣會吟侶筠窗擘
時寒小翠菊分香洗手盡消樽醪何年化石波飄出溢
金膏故國天杪枯梢無數依稀粉本尙留纖爪咸淳臨安
志西湖葑

田產蟹謂之湖蟹本草蟹入洞
穴年深成石蟹畫家有蟹爪樹

瑤花

東風薄劣墜粉吹香又去年情緒高城亞字煙淡抹尋
到笑桃門戶扇羅風小憎半掩銷疑眉語料生來千媚
中央解唱瀟瀟微雨促人纜解頽陽悵一片吳波堪
斷腸處黃鸝巷口可憶否舊日崔紅曾住綺疏天遠便
不管雲昏月苦縱他時重問芳遊迷卻綠陰歸去

燕山亭

唐開成陀羅尼石幢在龍興寺 幢為處士
胡季良書埋地中已久下有舍利五十四粒
崇禎丙子忽放光掘得之都穆趙嶠諸人所
未見者也同徐丈紫山賦此解俟好古者采
焉

劫化荒燐風齧怒濤香界尋常都捲科斗字殘蜥蜴碑
沈故物武林稀見怪石能言夜光迸天陰深院奇幻比
雪後峨眉佛燈吹徧 追數甘露初過又唱出翹翹上
林花亂剛紀二年忽涌青幢銀鉤刻來四面讀罷蒼涼
無片語可銷征戰堪歎聊拓取學伊懸腕

花心動

玫瑰花

無力縈煙馬塍邊晴飄夾衣時候疑是紫雲濃笑妝臺
幻出綠叢微瘦粉心黃顛鮫紗膩愛香韻年年依舊為
花惱芬氲一縷破禪銷酒 巷陌侵晨賣否常映竹斜
門幾聲初逗髻壓退紅鏡點殘鞋休傍辟塵釵溜泥金
曾拂宮人帶歎今日佩珠何有翠陰裏徘徊撚枝在手

梅子黃時雨

蠶豆

誰種南山又蛾麥弄涼鳩甚分醉記似雪花開斷畦連
綴家近羅敷牆畔煮清香暗透茅簷底三眠起小樣翠

李梅山房集外詩卷二
五
籠添了蔬美 應是幽風詩意便新茶繡釘柔莢猶細
待和飯調酥棟花盈地殺菽霜飛燕塞遠苦相思有江
鄉味青堆市幾人買絲溪尾

滿宮花

細雨

看成煙吹做水低盡春陰垂地霏霏拂拂又濛濛不是
養花天氣 溼透子規聲裏人倚疎簾無味晚來幾滴
枕邊聞如在空江船尾

買陂塘

書帶草

倚闌窗纔題倒薤堦前柔綠栽徧離騷自古多香草愛

爾紛披纖軟還摛看似當日泥中人把并刀剪移根徧
遠總謝客池邊鄭公鄉裏一樣露痕淺 東風護野火
何曾燒斷年年生意流轉上闌不入羣芳夢且學青絲
低縮箋注倦笑兒女尋常也識詩名賤茸茸何限對遠
志猶存忘憂早樹留取映書卷

又

仙姥墩在清波門外聚景園相近

水中央一亭浮遠風楊遮斷城角餘杭阿姥當壚住景
物眼前如昨思小酌只釀法無傳空負方平約玉蓮杯
弱更喚取花姑調成花液當了萬年藥 人閒窄除睡
醉鄉堪託沈腰何事愁削仙山樓閣多塵劫况此綠陰

門鑰休冷落自游戲壺天謾使癡兒覺春衫香薄攜蜜
炬三條蘭醪一斗同唱夜飛鵲

滿江紅

題桃花扇傳奇

千古南朝剩滿眼鍾山廢綠問誰記渡江五馬玉樓金
屋復社尙興風影禍教坊偏占煙花福笑無愁帝子莫
愁湖懽娛速醉舞散灰緋燭宮騎走降旛轟看湘東
已了枯碁殘局桃葉渡邊飛燕語桃花扇底銅仙哭算
付將此曲雪兒歌難終曲

探春慢

宋宮洗鉛池在梳妝臺側今爲僧院

鳳去山枯鵲啼月墮東風吹瘦波影脈脈流香亭亭浸
玉空對琉璃明淨花片魚銜得縱還有脂痕誰省幾時
鎖卻妝臺回頭鄉夢無定白雁來時秋勁早淚滿碧
紗塵暗清鏡楊妹詩妍劉妃笙脆往事十分淒冷未浣
深沈怨謾汲取頻煎茶鼎換了空門孤燈春雨鳴磬

霜葉飛

九日葛嶺用夢窗詞韻

最愁秋壑堂前徑秋蛩秋草秋樹雁雲無力護微霜捲
盡平湖雨愛此會清觴泛羽君看殘菊皆千古歎舞燕
歌鶯但博得銅駝恨事枉費毫素同是鄭客迷蕉風
埃牢落醉中休倚能賦欲從句漏訪丹砂挹袂聽仙語

憑小閣香生幾縷飄飄容我吹笙去謾再尋西峰頂喚起金蟾海天空處

瑞鶴仙

咏菊爲楞山生日效蔣竹山體

林阜寒近也看麕眼籬根菊錢圓也鱗鱗雁雲也又霜花淒緊放秋歸也冰泉引也望南山煙嵐淺也自義熙開後重陽甲子幾番題也遊也傾壺細泛冒雨幽尋足清娛也天隨子也和紅杞采將也笑桃鬟杏靨爭春烘日不似潭花壽也祇金衣黃鵠多情舞裳伴也

江月晃重山

月夜渡錢塘

江上已收白露月中微辨青山江如羅帶月如環乘風去江月在檣竿記得瓜洲問渡舊遊光景重看客心鷗夢兩般閒涼煙外一抹固陵關

高陽臺

蓬萊閣望海

雲斷山痕天黏水影望中何處蓬萊奇絕殘秋茫然對此浮杯祖龍可是慳仙骨甚西風不送船回最堪衰老卻扶桑忘卻誰裁而今社鼓斜陽裏已湖虧舊鏡梁換新梅一朵青紅虛空那有樓臺琴心賦筆看俱嬾洗崢泓襟抱全開白無涯月又初生潮又初來

蘇武慢

李梅山房身詩夕卷二
謝疊山先生贈家半村先生詩真蹟卷子
半杓先生諱元吉字无咎宋咸淳七年進士
仕爲烏程縣尉遷著作佐郎入元徵聘不就
隱居以終此卷今藏姚江族人處

朱烏歌殘白翎詞起天地一家春別霜凋玉樹風折瓊
花只有野梅高潔曾憶故人拂袖歸來暗霑清血又燕
臺塵杳曹碑魂斷夢尋薇蕨江上路冷菊空籬疎燈
破屋長記義熙時節琅琅夜誦滿紙驪珠驚說半天虹
月應是怕伊鬼泣龍愁巧偷豪奪放扁舟西去從此相
思晉雪

臺城路

上虞百官江口舜廟

重華不見蒼梧遠西風忽吹人世苦竹荒濱冷葵習井
那有窮蟬苗裔翠峰相倚恍二女明妝含顰長是日暮
神歸村簫聲歇陣鴉起江東客心悽絕渺餘情飄入
湘月湘水鳳瑄雲迷龍裳雨壞後五百年何事欲行且
止漫拂拭殘碑古香難洗紅染楓天灑空千載淚

滿江紅

曹娥廟

簾捲冰綃開面面軒窗貝宮有越上采蓮兒女來覓遺
蹤飛楫浮江仍競渡畫衣拖水似凌風佩明珠若箇許
同遊孫媚容花舊在紅處紅紛屢舞列歌鐘忽霏微

靈雨遠浥千峰收釣客歸山色裏讀碑人立暮煙中望
青林一帶隔潮痕都是松

唐錢塘孫戩八月迎請船覆死戩女婿谷
巡江哭以瓜設祭投江抱父屍出事見文
苑英

蘭陵王

三高祠

冷煙闊笠澤茫茫釀雪垂虹畔搖蕩素波鷺入蘆花雨
明滅枯沙抱斷玦清絕眾船唱歇殷勤問如此水鄉定
有飛仙弄華月 黃金鑄重活自一舸飄颺忘了吳越
秋風又到愁時節拋洛下秦地貴遊無夢蓴香茶熟味
最潔笑名是何物 騷屑漫晞髮厭格鬪蝸巢相响魚
沫青山今古銷豪傑愛釣雪亭外釣絲風刷翺翔無所

洗眼望翠佩

江城梅花引

扁舟如葉過紅橋雨蕭蕭雪蕭蕭樓外闌干闌下廣陵
潮一夜官梅開欲綻野梅發送將行伴寂寥 寂寥寂
寥碧雲高飲未豪吟未調寄也寄也寄不便南雁程遙
憑仗空香吹入玉人簫彈與北枝花上淚千點點有東
風不肯消

釣船笛

韓侯釣臺下作

清角起淮城寒緊拍天風浪底事不留英傑笑乃公將
將 枯荷野鴨小洲前卻愛釣絲漾何似客船吹笛過

南昌亭上

淡黃柳

賦曉色

河斜月淡，啾啾鄰雞，急遠夢初回。窗影白，纔辨鞭絲帽帶。催起勞勞，早行客。度阡陌，煙中樹如織。何人破新霜跡。料梳樓倦眼，開難得。一路惺忪，半村微亮，腸斷玲瓏唱出。

樊榭山房集外詞卷二

樊榭山房集外詞卷三

錢唐 厲 鶚 太鴻

秋林琴雅 原三十五闕編入正集十一闕

倦尋芳

揚州與江佩水別三年矣。辛丑春日在都下，重見于程蓉槎齋中。話舊悽然，因製此曲。水萍不定，煙月無端。人海逢又曲曲，萸灣空老。那回楊柳，十二街中，燈過五十三樓。上寒銷九數年華，但簫沈夢遠，鏡窺吟瘦。共細乳分茶，清畫門外塵縑。儂定能否，淺碧西山，贏得此懷如舊。相見猶憐，雲聚散，相思應在花前後。似分明話秋池雨窗時候。

花發沁園春

瓊花觀春宵小飲

柳裊新栽杏開初嫁竹西自古隋苑因風側帽借月窺
簾九里繡街行半青旗影轉攜酒訪深沈瑤殿正扇暈
寒拂飛鸞釵光明動棲燕 可惜司花不見繞無雙亭
前細訴清怨香憔悴雨絕星移十二畫闌天遠傷心
未慣聊一醉問春深淺念草草約伴籠燈吳船江上歸
晚

聒龍謠

虎丘

鬢影春船鈴風午樹一徑松門苔繡北去南歸帶幾番

歌酒聽歌侶畫壁無蹤覓酒伴卷波非舊祇年年小泊
情懷渾相識半塘柳 吟邊石望中樓罨歷亂墜絮拋
殘芳晝客心孤迴更闌干垂手過清明尙未還家問燕
子定巢能否者些時吳水吳山盡成迤逗

百字令

表忠觀懷古

雲旗風馬見虯姿髯鬚英雄徒步啼得羅平妖鳥盡自
向錢塘開府玉册樓高錦衣城壯百萬貔貅駐江神心
折迴濤先避強弩 休說朱五經兒東南霸氣三世偏
能據天遣山河都姓趙拱手還歸真主麥飯空祠柳圈
寒食緩緩歌遊女蘇碑仍在眼前龍鳳飛舞

霜天曉角

華秋岳松月圖

杳牙老樹記得何年遇攢出翠鍼千百是妙手新栽處
過雨涼月吐紛紛清影舞孤鶴不成秋睡又翻下半
空露

南樓令

醉仙圖

無夢到槐柯蓬山自踏歌酒逡巡頃刻花多有酒有花
吾事辦呼冷月出滄波落珮任顏酡壺中一太和儘
長年銷得婆娑便道老仙真箇人世醒待如何

玲瓏四犯

南屏和徐紫山韻

九疊匡廬恰宛在湖南松雨新染畫出青紅斜照玉匳
開展隨意捨卻划船指竹尾數峰遊徧聽下方鼓笛聲
來穿塔冷雲遮斷暮鐘初起僧歸遠碧玲瓏有人句
管重尋涑水崖碑在零落釵痕蒼蘚還問劍氣長埋一
例魚燈吹散唱夜涼山鬼紛萬古騷情亂

八寶妝

孔雀

影孕初成花屏未落只傍瘴煙暝雨萬里攜來闌檻裏
文采愁他相誤金盆新水一泓地錦安排濃春時霎婆
娑舞誰惜明妝圓翠矜誇兒女暗憶筇竹叢深鷓鴣

啼教舊棲知在何處怎肯供榕陰珥戶且聊向藤壑閒
住待升卻聯拳左距莫迷秦客蹇芳路正貝葉香清佛
鋪有日歸依否鹽鐵論南方以孔雀珥門戶鄧椿畫繼宣和殿荔枝結實
孔雀在其下召眾史圖之各極其思華采爛然但孔雀欲
升藤壑先舉右腳上曰未
也孔雀升高必先舉左

掃花遊

白石蓮花燈

曲寮夜迥正裊鬢茶煙一枝斜颭玉餅數燄勝驪山琢
就暖泉香汎水月分清葉葉釵頭乍斂最淒黯是霜苦
校書虹冷談劍 升降吹素豔恍照破秋心滿懷蕭澹
六時漏點更東林夢去岫深苔掩絳蠟啼香幾許風情
自感小憑檻捧重臺妙明無染

金浮圖

元中峰禪師遺履在雲居寺

松門碧千秋講席不借猶存素絢如昔想高僧定後工
詩筆養就新篁自具參天標格踏破山青雲白雙趺解
處游戲何人識 蛛網積堂空磬寂未墜真風笑他留
隻茫茫大塊同為客回首連昌薛暗文綦跡幾緲軟紅
可惜攜看過午葉響煙林側高峰謂師是
竿上林新篁

三部樂

流求紙

瀛海荒唐訝未識蔡侯素濤懸影一簾花雪輕揭煩他
文頸早傳徧山北山南坐鬪鏤樹底石几鋪淨碧環島

女可有譯書題贈 坑灰昔時乍冷說先秦采藥襞牋
誰證鬣帆又移近浦星槎風定展松紋乍磨翠餅須分
寫歡斯異境身世似粟蓮鬚外天水遙永

歡斯流求
族姓也

水調歌頭

訪吳丈志上寄老庵

撫景不自得奈此綠陰何試尋北郭隱處亭角掛煙蘿
門裏簾櫳如鏡門外帆檣如薺靜躁隔無多夫子一邱
壑舉世盡風波 枕琴眠看雲坐采芝歌老來苒苒奚
事圖史日摩挲與我周旋作我不恨古人不見鶴鬢任
教蟠蟬亦愛清境流響出庭柯

澡蘭香

五月一日臯亭山下競渡

霞翻浦樹雪濺汀蓮疊鼓彩虬欲起梭船貴買鏡檻先
開盡逐鬧竿游戲定何年鳧羽淩波風光留人似此打
扮杭州十里銷魂煙水 棹轉盤渦更險為憶山前受
降遺事花釵翦艾麝粉吹菰越女但知沈醉瞥回眸眾
裏盈盈行雨防霑羅袂念散後夢繞湘雲涼愔新睡

宋黃
公紹

競渡權歌朝了霍山朝
岳帝十分打扮是杭州

買陂塘

題洞庭龍女圖隲括湘夫人辭

白雲來洞庭渚北雙眸眇眇愁予秋風乍嫺層波遠木
葉翻飛如雨期又阻獨騁望蘋中不見巢青羽相思欲

夢梅山房集外詩卷三
五
訴悵澧有紅蘭沉生碧芷公子杳何處朝馳馬忽向
江臯羈旅佳人邂逅低語未能騰駕偕煙逝築室水心
如許蛟瘦舞算只在椒堂荷屋香蘅宇裸遺南浦看霓
帶繽紛九疑迎得聊以共容與

金縷曲

白燕和紫山韻

掠影分池面訝今年社前初到練拋雙翦珠館何時歸
去後不定翩翩風顛還細認謝家深院卻怕芹泥輕澆
得舞爭高月底依稀見銜墜絮舊巢伴倚紅杏處花
微歎恁休誇烏衣輕俊羣遊非慣飛上銀旛相比竝已
別春溫爐炭簾下誤玉人低喚莫是灞橋寒尚在阻鈿

車寂寞音塵斷看弱羽帶流霰

湘春夜月

當歌有感

翦春燈越羅無奈寒侵裊裊乍囀鶯吭清絕月穿林丁
字竿垂簾下恐落梅風起吹散難尋算世間只有酸甜
幾拍堪訴情深朱顏暗換錦屏迢遞千萬沈吟搵透
啼衫知那裏弄絲煙柳猶繫人心鱗乖雁阻寫翠牋誰
是知音恁怨咽縱當時聽得愁眉早聚何況而今

憶少年

朝雲湖上春風門外非煙牆畔行來似無力好花枝微
顫評泊圓姿應未見憶長蛾碧山俱遠清宵夢難到

恨雙雙銀蒜

戀繡衾

羅屏低隔塵繞街冷香茸初卸小釵見說道分攜近悄
無言愁黛費猜雁燈花共珠啼墜寫烏絲剛捲又開
始信有銷魂賦最銷魂蘭漿未催

玉樓春

銀塘冰泮晴波溜照影獨來凝立久一痕風帶不須寬
兩翦山螺依舊秀釵梁蜂蝶勞纖手底事暗驚朱粉
瘦欲絲未絮恰纔芽漸逗新愁渾似柳

清平樂

香塵不起鏡屨清於水親試盤鴉簾影底細雨蘭膏微

賦 徘徊欲就雲縞些些轉側橫波聽得花冠唱也料

應堦日斜趁

庚信賦選
抽鏡屨

賣花聲

豔韻徧芳蹊幾字高低宋牆東畔謝橋西喚到將離春
事減腸斷紅閨解語定淒迷留綴鸞篋香隨口角賤
如泥猶勝風欺并雨妒分付鶯啼

鳳凰臺上憶吹簫

瓷簫

紫竹猶多白牙翻賤別有哀玉清圓盡奪得千峰翠色
寄與秦仙一夜秋生指下通宛轉星孔勻鑄瓊枝瘦脆
管似鵝輕翳如蟬誰知越窰古製好吹出氤氳五色

飛煙莫負卻青鸞素約冷倚襟前風外花甌共夏修新
譜悠咽逾妍空明境依約赤壁回船

水龍吟

題董羽出水戲珠龍圖上有御前之印并宣

和御押

千年紙上風雲弄珠飛出宣和殿滄波涌雪銀鱗墨爪
騰空如練閒卻綃宮橘花開盡有何人見只豢龍舊姓
毘陵啞子吹腥雨穿枯硯回首天家頓遠尚塵中匆
匆流轉神湫易改青燈素壁鎖痕休斷笛裏吟殘梭邊
眠熟不勝清怨望冰簾影外香銷幾縷海山秋晚

賀新涼

秋日登八詠樓

衫袖秋情逼倚闌干一時收盡金華山色多謝連朝西
風緊吹我萍蹤江國又吹上層樓孤立欲洗胸懷忙呼
酒但溪聲西去鴻來北雲渡水天爲黑參差城郭今
猶昔念休文一麾去後聲名輝赫宴罷樽前惟家令老
妓依然相識惹滿座傷心皆泣大好東田歸應早便詩
傳八詠真何益聊小住聽漁笛

樊榭山房集外詞卷三

三

樊榭山房集外詞卷四
錢唐厲鶚鶚太鴻

秋林琴雅

原四十一闕編入正集十三闕

瑤臺聚八仙

題徐丈紫山黃雪山房在學士港口湖山幽勝處也

湖影拖藍門巷冷秋氣盡在茅檐掉頭歸興隨分繡了
霜鐔一夜幽蛩聲乍咽小窗幾片葉聲添正吟酣瘦節
得意黃徧千巖心空埽屏豔冶便後身似住雪北香
南渭水西風塵土亦復何堪閒開琴趣自賞祇相識孤
鴻半捲簾籬花候愛有名濁酒無用閒談

水龍吟 雪中憶西溪
南郡水西 雪中憶西溪 同是閒閒 琴瑟自賞 閒時

白天碎碎飛絲打窗又是年時雪火銷香鉅凍膠吟管
傷懷念別前度衝風江南江北酒旗明滅似寒鴉身世
驚棲不定歸來後欲華髮 心事無人能說憶西溪此
中清絕壓蘆浦冷吹花橋斷玉山遙列三兩煙舸捕魚
初罷柴門如月便長鏡荷了自尋黃獨也堪怡悅

點絳脣

八山

燈夕同宋杏洲周少穆集吳尺鳧瓶花齋

柳院燈疎史達朦朧淡月雲來去李益年華似羽陳允無計相
分付毛滂萍梗孤蹤晁補往事隨風雨黃公君知否晁沖煩君

妙語王沂

留我花閒住姜夔

渡江雲

題汪叔江紅藥橋邊吟客圖

蕪城當此際峭風捲雨黃柳尙蕭疎玉句亭畔月底事
飛來澹彩照西湖襟情雪鍊儘乾坤清氣偏孤同調處
花閒花外麗句也堪圖 何如二分無賴十里銷魂記
樊川前度閒瘦損燈邊繭栗葉上盤盂君歸爲問花安
否想豔紅依舊紛敷春夢闕江南夜夜啼烏

綺羅香

送紫山之秣陵和留別韻

象管題花冰絃彈雪難得詞場同氣白髮相逢眼底何

論餘子已闖破竹屋藩籬更探取梅溪涯涘喜從今軟
繡湖山青旗風外踏歌起無端堪此小別凝竚浮雲
墜絮離蹤應似舊院煙銷去問秦淮春水待肯寄硯北
香牋還勝寫江南眉史夢隨君片月斜明鶉聲帆影裏

六么令

春陰

雲留春住濃與恨重疊欲飛雨絲還懶水際天低帖漠
漠穿簾疑暝燕子愁時節誰家羅襪翩跹無影惟見沿
堤草痕接風姨空帶妒性未解輕吹裂閒壓幾曲疎
闌盡上眉心結最不分明似夢欲說終難說樓東悽絕
芳期仍誤錯認梨花是斜月

摸魚子

簡吳尺鳧

乍歸來參旗還轉清幽繡谷無恙蘿垣拂翠低桐塢時
有鳴鳩相向蒐討廣愛似爾詞人心力拋非枉輕謀佛
帳更換芋書多彈蕉文好點筆石闌上當年事復壁
應堪惆悵揚舲洗眼頻望披襟不比燕臺雪佳月新燈
春釀難競爽寫雙調吳蠶食葉毫尖響澄湖熨浪約曬
笠秋晴碧山如髻漁笛譜漁唱

尺鳧近和予臺城
路咏蠶二首最工

臺城路

富景園宋史所云東園也舊在新門外今草
橋門內近城卽其故址空池喬木閭巷蕭寂

予每經行不知古情之頓深也

生年落拓東城下溪雲素心都負跡似潛夫身如灌圃
只記南朝衰柳牆根井口抱一片晴沙眼波微溜縱不
關愁露桃愁到不言後探春那回行徧冷餽猶未賣
人尙中酒藏謎花樓戲嬰水館別有憑闌紅袖新煙信
否過幾度酸風翠梢眉鬪竚立誰知暝鴉飛去久

又

南湖感舊和蘭嶠韻

陰陰古水橫寒綠誰家繞門煙樹十載閒踪三生昨地
銷得吹香詩句眉彎老去剩暈秀遙山半低晴渚盡日
人稀碧蜻蜓冑蓼花住傷離還有舊伴周情兼柳思

檀拍無誤岸缺連雲闌空進月絕憶單衾眠雨幽悰未

苦更草暗王孫待歸遲暮欲覓風流問鷗鷗不語楊誠齋贊張功甫像云約齋子方內歟方外歟風流歟窮愁歟老夫不知君其問諸白鷗

又

五月十八日東城閒居風雨騷屑忽動吟秋
之思書寄吳石倉先輩

閒人不作閒居賦新涼遽侵槐夏徑暗雲生池鳴雨到
誰共聯牀今夜平林急灑便招得秋風扇情疎謝十載
江湖起看窗畔釣筒掛須聽田水瀟瀟插秧殊未晚
盈耳陶寫屋捲重茅籬觀朝槿此意從無知者殘書嬾
把料城外荷聲小樓清野夢遠重尋白頭燈底話

又

用儲華谷韻

銷魂橋畔青青樹樹猶似此依戀卻扇涼肌垂釵秀髮
爭得微波心暖花遊易斷早吹散尊前豔歌珠貫說與
鴛鴦晚汀自結綠陰伴重樓依舊十里小屏留倩影
歸路猶短七孔鍼邊雙蓮節後知否移燈書怨行雲不
管悄隔了盧家玳梁棲燕好比江臯弄珠帆漸遠

又

懷大滌舊遊

白雲多處飛仙住相思與雲爭繞泥酒衣單修琴歲換
零落來時瑤草塵緣未了見舞罷山香墜花侵帽瘦卻

詩肩翠匳看影自成笑

清遊無伴最好亂峰開九鎖

曾許行到石腳跳泉松髯滴露千古長懷坡老何堪俗
擾待寄語芝童洞天仍埽一覽篝燈浩歌星斗曉

月下笛

送周少穆北遊兼懷是諫在上虞

草長鶯啼江南節物送君南浦無情弱櫓慣話聲聲離
緒抱蘭絃空山共期滿衣雨雪生妙悟向游塵撲馬垂
楊籠袂此懷誰訴杯行易盡挽碧水東流晚煙何許
勞歌散處便是衰燈孤旅太飄零未垂鬢絲壯心好在
如意舞雁書來試問看碑有客先寄與

摸魚子

咏窩絲糖追和陳迦陵韻
翦瓊霜翠蓬深處葱纖費盡料理果匳已逐銅仙散異
味何人能嗜勿利市勝猜徧晶貌玉乳雕闌底春絲若
此想埽雪三千揀花五百甘冷未沾齒冬郎去塵滿
金鑿密記多情樂府分製等閒粉繭消元夜偷裹銀泥
衫子評泊似也不似君謨遠貢輕紅荔燕姬解事悄比
並當時鏡鸞撲碎墮馬一窩細

瑣窗寒

爲吳畊民賦因樹亭

老綠迷空閒園已過百年風雨陰陰幾日得意鳥聲喧
處儘無人欷牀勘書碧浮篆蚓簾波午話洗桐舊事移

橙佳境問梅清句前度鷗朋聚笑對影忘言覆棊非
誤江湖散盡冷淡杯泉衣露料中宵桃根共攜待將片
月臨翠羽領秋光未要深山踏葉橋邊去

白苧

偶閱瑤華集載紫山此調愛其婉麗依韻和
之

引愁來伴愁住眉長眼細愁無貯處染得桃花似醉倩
雛鶯趁閒喧破翠衾睡應悔月沈鉤語未盡匆匆分袂
離悰怕覺歸展柔羅補淚怪淚痕近時都化苔生砌
驚起社前等燕巧夕藏蛛小顰輕笑難道何曾省記便
證絮拈萍與伊爲誓而今異昔漸檀霞褪靨玉香銷臂

悄立閒庭劃損瑤簪春又相棄甚日逢迎不枉丹青寄

南浦

玉几久客真州不得消息歌以懷之

分手隔年期問而今忍見清陰如幄搖曳箇蟬鳴懷人
句還似淒然同作吞花卧酒兩湖煙月都蕭索應爲青
山無計買只把薄遊銷卻 長安飛雪深窗與梅花主
客西溪曾約歸到定秋陰悲秋意仍在小園籬落今晨
剝啄翠篁風動敲疎箔何事因循書不寄知倚那家江
閣

百字令

六月望夜宗陽宮老君臺玩月括楊仲弘詩

老君臺迴夜涼多如水卧看分明穿出冰輪松桂外二
更將轉三更大地塵消山河影小風露上頭生寒侵環
珮九天飛過無聲 誰喚絕唱楊郎龍蛇竝起金榜埽
初成笞鳳鞭鸞遊賞極玉纖雙載吹笙不信人間輸君
才調猶阻弱流程醒心今夕此身真到蓬瀛

西子妝

同符幼魯趙谷林意田西池納涼

欹榭何峰穿簷那樹步過綠陰斜徑天然十畝瘦西湖
恍相思采蓮人靜闌干更迴壓風鷺絲飄不定遠香生
頓夢辭冰簟涼歸衫影 攜幽興隔竹山童小煮紅囊
茗一篇秋水趣無多澹娟娟柳深沙淨疎蟬曳暝看催

展綃煙籠鏡任螢飛自照回塘夜永

露華

玉簪

峽雲夢遠覓鬢底瑤肪悄在秋苑露朶半欹遮住青鸞
輕扇絕憐淡雅風姿只隔幔紗遙見涼颺度嫣然笑拈
鬪埽初綰 銜來貼地腰軟稱香浸銅瓶幽素零亂脆
萼猶函黃粉何事吹綻幾日靜抱花愁恩重碧潯芳宴
闌影外琤琤雨敲又晚

貂裘換酒

得子珍廬江書詞以代答并及繪友消息

世事今無味卧風前晚涼岸幘停雲思起驢背黃塵歸

先後不道分攜似此似社燕秋鴻相避巢姥湖邊安吟
笈弔曹公寂寞英雄地歸不速負春水 草衣我亦隨
緣耳愛東園清蟬古木說義皇意一卷傳來天台句移
得泉聲在紙定袪暑明朝都洗屋角斜陽明沙外剩斯
人近又遊燕市竹溪約幾時是

徵招

爲蔣丈雪樵賦

忘機石上行歌去清寒自然堪耐萬玉綴疎林笑青山
顏改徑迷歸鳥外怕埋卻幽人蘿帶白斷溝中溼侵焦
尾問誰能買 南北兩番風仙家事重看冷塵飛灑酒
熟倒葫蘆有山童相待梅花猶可戴指千古煙梢春在

會心處與伴披裘已洗空銀海

浣溪紗

獨背低花一欠伸舊攜手處綠生塵怪他鸚鵡語如人
未肯無情拋好月長將多病伴濃春樓中凝望鏡中

顰

踏沙行

湖上有感

屐齒沙痕鬢絲煙影十年迷卻探春徑憑誰重唱竹枝
歌淒涼不是當時聽敗舫紅凋危闌香凝湖風還我
登臨興梨雲柳霧捲俱空而今纔放青山醒

摸魚兒

七夕雨中集小山堂分得漸字

問天邊妒津何許今宵銀浦偏暗巧棚兒女關情事羸
得英雄悽黯渾是感算雨雨風風盡把心期賺青樓夢
澹任不嫁娉婷應須覓箇羅屋竹香掩開襟話洗出
平池菡萏詩思多在涼簟秋光挽住憑杯酒莫放鬢霜
來漸雲半斂傍幾葉高梧漸瀝聽殘點溼蟾未減恐靈
鵲明朝訴伊辛苦花水羽衣染

阮郎歸

殘香漠漠雨垂垂寒輕猶戀衣無端箏柱似佳期參差
常暗移慵曉起怕春歸咒教花放遲桃花也有念人
時倚窗窺畫眉

洞仙歌

秋陰

癡雲何事做人閒
秋窄倦柳衰蘭更無色
想登山臨水
宋玉愁多風吹去
遮盡湘天暮碧
孤村煙草外一片
淒迷白鳥明邊倚樓立
情味近中年最怕傷心都付與
數聲長笛問那處天涯有斜陽待雁寄書來定知消息

清平樂

宿符聖基秋聲館同幼魯作

酒香人定冷落黃花徑
吟到江楓寒未勁
雨入竝笙堪聽
自饒宋玉才情何妨榜以秋聲
今夜秋聲重做斷
雲新雁程程

樊榭山房集外詞卷四

樊榭山房集外詞卷四



